



宛丘先生文集卷第一

曹州深州所藏

張栻文潛

賦

大禮慶成賦

惟宋六世皇帝踐祚之七年所以和同天人綏靜中外垂鴻霽裕增高累厚以對於神祇祖考者固已蒙被充塞光融翕赫六合一意四海一口無得而言矣粵以壬申之仲冬將有事於南郊乃詔列位恪職賦事而有司建言惟我國家因時施禮郊丘之位天地咸在牲幣並薦禮樂合舉而古者乃以陰陽之至即

南北之郊別位殊時薦獻異數有司其何從於是天子惕然深思祗畏敬慎曰茲大事我其敢專羣公卿士典禮之官竭思和會以訂不易於是議者曰先王齋明以享帝而帝之享否雖聖人末由知之惟受福者其享之占也恭惟國家合祭天地於茲六世矣惟我太祖躬膺駿命以遏亂畧堂皇二儀拓落八極以定萬世之業太宗威定宇內震蕩大鹵以一九有定天下於一尊真宗熙洽富盛符瑞委積南牧之術不戰請命威加北荒奏功岱宗仁宗席安據厚不動指顧孽獠猾羗含毒內向吏士未頓藏竄屈伏終始太

平垂五十年英宗入纂百姓與能神考有為六服承德此可謂受天地之福矣然則神祇之安吾享也其久哉於是天子乃翳青雲之屋乘雕玉之輿應龍受轡招搖翼輶建虹霓之脩竿兮颺彗星之飛旂太一執節以先驅兮二十八星拱手布武經營而周流馳蹴六師雷霆萬乘初海沸而雲湧忽山峙而川靜蓋天子粹然玉溫健然天運望宮門而動色顧執策而命進惟烜赫之靈源兮實鼻祖於神明覽光德而來降兮館玉宇之嚴清張咸英之廣樂備千籥之盛舞景光交徹鸞鶴來下神嬉靈豫醉爵飽俎翼、清廟

觀德之宮七聖在天時降于宗時降於宗世有哲孫
宣弟無疆惠我文人瞻祖祐而念功兮顧禰室而感
親聖孝油然而發中兮在位望而含辛霽暘告旦祥飈
掠塵從我髦士來祗精裡御史肅吏司馬飭兵既透
透遲：雲流而日行兮又洵：業：海運而天聲靈
旗洪頤翕赫歛霍兮攫拏龍虎而亂鯤鵬雄鷲滄威
而震伏兮柔良化禮而肅清弛威弧戢天戈兮固已
熄滅蚩尤而折撓搶執飛廉圍商羊屬之有司兮羲
和磨刮披拂盡獻其光明蓋傾都空閭翹首跂足俯
窺履綦旁覘佩玉者忽焉不知手之加頽口之成祝

也於是背都城望惟宮郊垆坦其迤邐兮場圃既寒
而畢功頽青雲以連屬架虹霓之經緯紫微下屬於
兩觀勾陳錯施千萬雉扶傾之神仰立而拱翔德之
龍下抱而曳疑神變之歛成兮涌九地而出峙連廡
千柱廣殿萬杙飛甍闢桶洞窟屹壁酸肢之隅眩目
之極唐洛執筭而莫計班倭操斤而自惑者類非資
材于斷塹而皆機杼之紡績也一室之用足以溫一
家一宮之費何啻衣一國驚霆之蹕既震洶壑之聲
咸寂敞齋寢之靜深兮何清虛而邃密天子方端而
虛儼而一多儀未舉精意已塞甲夜始晦嚴鼓載作

飛歛走伏神警鬼愕望舒騰精以燭宵兮玄冥收威
而布德靈鼉五震軫車將中天子乃被袞執玉兮齊
明莊栗之誠動于進趨表於形容千燎具揚萬炬畢
融上拊熒惑旁爍燭龍近為朝陽遠為融風赫々曦
曦煌々輝々列次之士野屯之師歸如酌醇醪而御
兼衣黃流汪洋璧玉照徹祥祲衡布協氣下浹音為
樂和形為人悅白質之獸蕭聲之鳥紛披雜沓應奏
而舞節陟降既周燎煙始升彗星走虹奉璧薦牲豐
隆奔馳而仰驚兮祝融焜煌而上征開閭闔兮闢清
都后帝燕兮百神愉圓錫蓋兮方獻輿岳輸固兮溟

効濡於是禮備樂成整車而旋萬類環極端門闢天
賞出千庾恩流百川北包大壤南盡島蠻西越流沙
東窮海壖令未脫口雷運風傳野無窮人獄無宿愆
破械解縲負帛囊錢車及其舍士復其伍効技呈才
千鏡萬鼓天子舉酒以屬羣公咸曰休哉天子之功
系曰於穆聖主建皇極兮嚴恭精禋帝來格兮柔祗
並位儼牲璧兮文祖右坐臨有赫兮於惟祖宗有常
則兮諱兵畏刑後貨食兮政有損益茲不易兮帝則
鑒之戩穀錫兮兢々業々日一日兮三載一祀年萬
億兮

游東湖賦

紛不知吾之所如兮獨漫：而若狂乘醉飽之餘力
兮遂陟巘而緣岡惟大冬之栗烈兮莽川澤之茫：
農功休乎場圃兮平陸散夫牛羊憫大木之百圍兮
慘赤立而無裳鶴鶴羣鳴而下上兮雜篁竹之青黃
忽平陸之既窮兮漸積水之汪洋曰是為齊安之東
湖兮右派合乎濤江荒灣寂寥而葭葦兮懸䟽曾乎
夕陽為舉網而無獲兮哀淮夷之陋荒呼徒侶吾還
歸兮嘉魚逝而洋：弔村落之柴荆兮陰風振而塵
颺畏星昴之將中兮冒玄夜之飛霜願謂童子汝其

賦詩爰有小子衰然致詞歌曰歲窮木落兮入澤空
雁宵征兮天北風曷不飲酒兮御玄冬歸來歸來兮
樂未終余曰汝歌置之乃歌曰臨山川兮懷故鄉歲
窮陰兮晝不暘升高堂兮潔余樽耿余思兮古之人

問雙棠賦并引

雙棠者文潛寓陳僧舍棠下手植兩海棠也始余
以丙子秋寓居宛丘南門靈通禪刹之西堂是歲
季冬手植兩海棠于堂下至丁丑之春時澤屢至
棠茂悅也仲春且華矣余約常所與飲者且致美
酒將一醉于樹間是月六日余被謫書治行之黃

州俗事紛然余亦遷居因不復省黃^花到黃且周歲
矣寺僧書來言花自如也余因思茲棠之所植去
余寢無十步欲與隣里親戚一飲而樂之宜可必
得無難也然垂至而失之事之不可知如此今去
棠且千里又身在罪籍其行止未能自期其于棠
未遽得見也然均于不可知則亦安知此花不忽
然在吾前乎因賦問棠以自廣云

寓舍之壤既膏且腴手植兩棠于堂之隅風來自東
冰雪融液興視吾棠既葩而澤乃沽我酒又命我人
期一醉于樹間聊快鬲于芳春夾鐘之初謫書在門

陸走千里止于江濱天星一周穆然舊春想見吾棠
粲然含姿俯睨舊堂今居者誰婉如怨而有待淡無
言其若思嗟乎始種自我其享將獲盈我旨酒會我
賓客一酌未舉俛仰而失事至而驚其初孰測惟得
與失相尋無極則亦安知夫此棠不忽然一日復在
余側也且夫棠得其居愈久益敷無有斤斧斷傷之
虞我行世間浮雲飛蓬惟所使之何有南東夫以不
移俟彼靡常久近衡從其志必償歌以訊之用著不
忘

柯山賦

入東門而右迴兮原迤靡以相屬拔磅礴以陸起兮
是為柯山之麓其上蕭森而晻靄兮冠萬竿之脩竹
下礪确而堅密兮拱高林與喬木散雞犬于危阨兮
雜茅茨與夏屋通樵漁之蹊遂兮路縱橫而斷續很
土石裂暗竇谷虛鳴鳥上下伏獸號呼俯江流之蕩
瀾招列山之蟠紆林巒作態而蔽虧兮風雲効技而
卷舒固可以開闔陰陽于一氣賓饑日月于天衢爰
有窮人癯然而歸曠四海無所投其足兮后帝命我
于山之隈庇蓬茅之數椽兮撫枵腹而常飢時醉飽
而自得兮亦杖履而遨嬉逾山而東席門草藩爰有

君子於茲考槃自種自食鄰里莫干圖書滿家兒稚
飢寒相見輒喜有時不冠寄萬事于一笑兮不知食
糲而衣單吾不加物以一毫兮亦莫愛人之燠寒悟
紛華之多虞兮幸寂寞之至安飲我薄酒懽有餘啜
我豆羹甘而腴隱几而休讀我書乃曳杖歌曰升柯
之巔明遠眺兮築柯之崦可以老兮終古不忒天之
道兮予：而行無喪吾寶兮

卯飲賦

張子晨起落然四壁千林霜曉四顧寒寂先生惘然
而不自得顧視壁間若有物焉短脰魁腹兮長喙旁

啄而椎髻上直也雖未知其何祥而津：然有喜色矣於是童子趨而進曰有是客曰麴生者願奉先生於頃刻先生欣然三挹而進之蓋其氣盡：而浮兮其聲瀏：和而幽兮其質醇：毅以柔兮先生曰甚矣予之不敏也今日乃知從子之游于是體之栗然寒者溫心之鬱然結者散已大忘于寒暑尚何有于夜旦挹麴生而告之曰吾將旦：與君周旋既導君以神良又餞君以芳鮮而可乎麴生對曰斥子之泉吾泉出兮枵吾之腹君腹實兮陋彼昏之獻嘲何富子于一日

鳴雞賦

先生閑居學道昧旦而興家畜一雞司晨而鳴畜之既老語默有程意氣武毅被服鮮明裝：朱冠丹頸玄膺蒼距矯攫秀尾翹騰奉職有恪徐步我庭啄粟飲水孔肅靡爭山川蒼：風霰宵凝黯幽窓之紉：况余夢之初驚萬里一寂鐘鼓無聲聞振衣之膈膊忽孤奏而冷：委更籌之雜亂和城角之淒清應雲外之鳴鴻弔山巔之落星歌三終而復寂夜五分而既更萬境皆作車運馬行先生杖履而出觀大明之東生

暑雨賦

提九山於空虛忽並擊而俱裂壅百川于河漢廼防
潰而一決哀下土之微生何足供夫摧折方朱鳥之
霄中歲仲夏兮大熱雖倏焚之一快俄鬱烝之莫洩
叢百指于環堵顧杖履之安設委熏煮於九旬淫疾
苦於百節付六鑿於渾沌獨天游而神悅忽脩然而
輕舉固已窺寒門而蹈冰雪攬北斗而酌天酒覲上
帝于玄闕聊逍遙兮窮年俯故居兮螿埴

蘆藩賦

張子被謫客居齊安陋屋數椽織蘆為藩踈弱陋拙

不能苟完晝風雨之不禦夜穿窬之易于上雞栖之
蕭瑟下狗竇之空寬先生家貧一裘度寒曾祛篋之
不卹何藩籬之足言鼓鍾于宮聲出于垣中空然而
無有徒望意而輒還故吾守此敗蘆其固比夫河山
若夫朝暘不出微霰既零聲如跳珠淅々可聽及夫
衡門暮掩烏雀就棲掛荒山之落景絡衰蔓之離々
其下榛草樵蕪往來螻蚓出入羊牛覘窺先生登然
杖藜過之瞻顧四隅憫然歌之曰公宮侯第萬瓦連
碧紫垣玉府十仞塗青何嘗知淮夷之陋俗窮年卒
歲乎柴荆也哉

燔薪賦

歲暮苦寒烈風不休先生家貧衣無重裘讀書夜闌
爐炭已灰先生瑟縮凄然不怡顧謂童子與薪皆來
童子曰是薪也陳之壁間自春徂冬風日所燬埃塵
所蒙固瀋液之乾竭朽外槁而中空唯利從燔無所
獻功與火相得赫然大烘堅斫節久而後燃後羣
枯而効技又熒々而不煙於是先生欣然環坐皆喜
或裸股出足或引手張臂窮谷蕭條薪炭如土蓋取
之而不竭顧此樂之甚富又何必琴材脩直獸材攫
搏漢壁之椒効煖魏宮之金辟寒誰知空山寒夜之

叟敢傲温于狐貉之前

今供上方炭率斲成
琴材胡麻文鶉鷓色

宛丘先生文集卷第一

宛丘先生文集卷第二

賦

杞菊賦

予到官之明年以事之東海道連水連水令盛僑
以蘓子瞻先生後杞菊賦示余：不達世事自初
得官即不欲仕而親老矣家苦貧冀斗升之粟以
紓其朝夕之急然到官歲餘困于往來奔走之費
而家之窘迫益甚向日悲愁歎嗟自以無聊既讀
後杞菊而後洞然如先生者猶如是則余而後可

以無歎也

有蓬四垣張子居官童子晨謁有駒在門張子迎客
平生故人予致其勤餽客以殮擷露菊之清英剪霜
杞之芳根芬粵滿前無有馨膾客愠而作謂余曷然
張子始歎終笑以言陋雖爾棄分則余安子聞之乎
膠西先生為世達者文章行義徧滿天下出守膠西
曾是不飽先生不愠賦以自笑先生哲人太守尊官
食若不厭况于余烏不稱是懼敢謀其它請卒予說
子無我嗟冥冥之中實有神物主司下人不間毫髮
夫德不稱享者殃勞不償費者罰予身甚微余事甚

賤聊逍遙于枯槁庶自遠於人患客謝而食如膏如
飴茲山林之所樂予與爾其烏之

涉淮賦

涉清淮之浩蕩兮聊以豁吾之幽憂轉峽石而下泛
兮觀波濤之複流何佛廟之巍峩兮隱于兩山之幽
眺東崖之飛閣兮納萬里之清秋昔淮人之倔彊兮
恃江左而不賓方中原之多故兮遂竊帝而稱鄰遭
世宗之勃興兮乘累聖之威神晝疾馳而奉命兮戈
三揮而遂臣始盤桓于壽春兮蓋嘗剉而益振驅貔
虎于順流分臨長江之廣津馳千里之玉帛兮擁百

萬之精軍計其一時之氣兮固叱咤而風雲嗟百年
之幾時兮山川儼其如新忽人事之幾變兮撫墟廟
而堙淪訪遺事於樵夫野人之談說指餘迹于荒城
故壘之荆榛徒見夫雲悠々而朝出水漠々而東流
飛沙鷗于晴渚聽夜櫓于行舟彼時豪盛此日廢昔
人功業今人愁嗟夫旦之心暮不可求前之迹後不
可再胡為寂寥之前古乃以興亡而感慨雖物至盛
者其存也宜久勢極大者其亡也可驚方登臨而遠
想豈獨予分忘情

涉淮後賦

余甲寅之秋自正陽涉淮作涉淮賦既至泗之臨
淮邑之東南皆淮也朝游夕濟兀淮之驚畏風濤
之變無不歷之矣今秋又以事之東海至漣水入
漣河舟人告余曰淮水自是入海矣予生二十有
二年吳楚秦蜀之國來往殆徧竊悲其迹之不常
作後涉淮賦以自廣云

浩淮流之湯々兮蕩余舟以泓洄嗟我居之不常兮
未暮歲而再來始進棹于正陽兮睨下蔡之窮城界
陳許之北壤兮望荆塗之兩山緬川原之迴復思禹
功而慨然爰繫舟于徐邑兮浸淮隅之兩壩駕長帆

于朝風兮凌星河于夜湍豈所覽之未周兮恨未窮
其本原忽行役而南去兮稅吾楫于清連指溟渤于
西北兮曰此淮流之所還彼百川之歸海兮吾固知
其必然惟循原而極末兮哀余迹之未安當天時之
晚秋兮風霜慘其既至山峭々而瘦出兮水紺紫而
無滓曳孤輪而忽驚兮出游鱸于短葦白鷺飛而下
來兮翩如避世之君子酒芳香而盈盃兮吾陶々而
日醉方頽然而遺形兮孰高卑而賤貴彼貴者樂其
府兮富者懷其資無二者之累兮余何驕游之足悲
窮天下之奇觀兮極覆載之所藏膏吾車而勿反兮

畢吾世而徜徉

雨望賦

淡海天之蒼茫觀驟雨之霏霏飄風擊而雲奔曠萬
里而一蔽卒然如百萬之卒赴敵驟戰兮車旗崩騰
而矢石亂至也已而餘飄既定盛怒已泄雲遂々而
散歸縱橫委乎天末又如戰勝之兵整旗就隊徐驅
而回歸兮杳然惟見夫川平而野濶夫雲霞風月之
容雷雨電電之變非巧力之能為蓋人間之絕觀必
也登雄樓傑閣之崢嶸憑高山巨海之空曠徹除耳
目之障蔽而後能窮極變化之奇狀嗟我居之卑湫

兮束視聽於尋丈顧所欲之莫得兮徒臨風而惆悵
暮秋賦
嗟余志之莫就兮哀天時之不予謀歲冉冉以將暮
兮無以蕩吾之幽憂昔吾之既有知兮獨信道而不
顧鞭吾駒之不戒兮眇一世而獨騫儼章甫以自好
兮安知越人之異容恃所持之不欺兮謂彼此之情
同夫何事物之多故兮因少愚而老智彼善惡豈有
常兮固繫夫一世之賤貴指礫以為玉兮人皆知其
不然衆既訛而莫返兮事隨信而名遷偽言實于衆
舌兮至寶賤于獨知正無助者必危兮惡乘朋而或

濟決大河而東奔兮挽余舟而上泝嗟爾楫之幾何
兮蛟龍鬱其何怒外既揆而度內兮考舊好之同異
韜九襲以深藏兮固可死而不可試卷杜衡之幽佩
兮苞芳蘭之翠衣畏久畜之不揚兮時竊陳以自戲
怨所資之不售兮非達人之宏規彼廢興之有命兮
何憂樂之足繫奏吾琴之憤怨兮酌吾酒之冽清攬
芳桂與秋菊兮聊以駐吾之頽齡吾又將之夫深山
兮遂絕世而遠去身九浴而後衣兮齒三滌而後咀
納冰霜于胷中兮蕩焦鬲之宿汚求仙人之奇術兮
與彭咸乎為伍彼君子之蹈常兮曷急世之有知聊

道遙以卒歲兮考天命而不疑

超然臺賦

賴子瞻守密作臺于園命以超然命諸公賦之余在東海子瞻令劉

貢父來命

或有疑于超然曰古之所謂至樂者安能自名其所
以然耶今夫鳥之能飛獸之能馳與夫人之耳目手
足視聽動作自外而觀之者豈不以為大樂乎然鳥
獸與人未嘗自以為樂也古之有道者其樂亦然又
安能自名其所以然耶彼方自以為超然而樂之則
是其心未免夫有累也客有應之曰吾豈以子之言
非耶吾方有所較而後知超然者之賢也予視世之

賤丈夫方奔走勞役守塵壤握垢穢嗜之而不知厭
而超然者方遠引絕去芥視萬物視世之所樂不動
其心則可不謂賢耶今夫世之富人日玩其金玉而
樂之是未能富也忘其所有而安之是真能富矣夫
惟有之是以貴其能忘之使其無有則將何所忘耶
子以謂將忘超然為真超然則其初必有樂乎超然
而後忘可能也子以謂樂夫世之樂者乎然則子亦
安知夫名超然者果非能至樂者也賦曰
登高臺之岌岌兮曠四顧而無窮環羣仙于左右兮
瞰大海于其東棄塵壤之喧卑兮揖天半之清風身

飄颻而欲舉兮招飛鶴與翔鴻莽丘原之茫茫兮吊
韓侯之武功提千乘之富強兮憑百勝而稱雄忽千
年而何有兮哀墟廟之榛蓬有物必歸于盡矣吾知
此臺之何恃惟廢興之相召兮要以必毀而後止彼
變化之無窮兮嗟其偶存之幾何聊微樂于吾世兮
又安知夫其他或有疑夫超然者曰豈其知道而未
純曰彼天下之至樂兮又安能自名其所以然惟樂
而不知其所以為樂之分此全所以為樂之全彼超然而
獨得兮是猶存物我于其間客有後之者曰子知至
樂之無名兮是未知世之所可惡世方奔走于物外

兮蓋或至死而不顧眇如醯雞之舞甕兮又似乎青
蠅之集污衆皆旁視而笑兮彼獨守而不去較此樂
于超然兮謂孰賢而孰愚何善惡之足較兮固天淵
之異區道不可以直至兮終冥合乎自然子又安知
夫名超然者果不能造至樂之淵乎

鳴蛙賦

余寓山陽學舍夏大雨屋四隅成塘聚蛙以千計聲
鳴不絕夜為不能寐客有獻予以殺蛙之術曰投余
藥一丸蛙無類矣童子將用之予曰不可復為賦示
之夏雨初止積潦過尺有蛙百千更跳互出幸此新

霽夜月清溢我勞其休歸偃于室于時蛙鳴若嘯若
啼若訴若歌若歡若悲若喜而語若怒而詬若噦而
嘔若咽而嗽瘖者之呼吃者之闐或急或緩或清或
濁若羗絲野鼓雜亂無節兮又似夫蠻歌獠語詭怪
之迭作也爾其困于泥潦失其所處而悲又若夫旱
暵既久得其所處而樂也爰有童子持燭來謁曰蛙
羣夜鳴君寢其聒考之周官洒灰驅蛤君其教之余
得盡殺余語童子爾無是酷爾樂而歌而哀則哭
則悲嗟樂有聲曲聚語羣爭引吭而呼一日之間不
寧須臾蛙不汝嫌汝奚蛙誅萬物一府誰好孰惡爾

奚自私已厚蛙薄參通彼已樂我自然弭爾怒心置
燭而眠夜半張子援枕而吁顧謂童子記吾言燉前
言未究請卒吾說物各有時夫誰敢遏爾觀夫春露
初霽朝華始粲文羽清喙飛鳴自如若奏琴箏而和
笙竽清耳悅心聽者為娛及夫陽春既徂炎火將極
惡草蕃遮濫潦瀦積蛙于此時生養蕃息跳梁號呼
意氣橫逸子如之何時不可逆時乎時乎美惡皆然
當其盛時隨得而遷及其雪霜既降木實草衰飛蠅
聚蚊孽無所施于是此蛙^缺吻收足^缺挺然土中一聲不
出黨散巢披不可終日盛不可常與衰迭來子姑忍

之矣以殺為哉

齋居賦

仲夏之月陰氣始至陽既盛而初剝陰浸亨而用事
水伏畏涸火熾方熾其於人也心實過炎而暗受其
弊惟人之生受命在子推卦曰坎於行為水微陽所
潛元氣之始故火甚烈則正氣或因而衰則水受害
者君子之所深畏于是屏事燕息滌慮齋居既靜事
以無刑又遠眺而高居却紛華而弗陳與淡泊乎為
徒絕嗜窒慾愛精蓄神聲色不御滋味弗親冲然與
和俱游湛兮以道合真故能體強志寧愉樂壽考遠

去疾癘保此難老嗚呼苟能推此以盡道考此以察
物則豈惟齋戒以御時宜其顛沛而勿失且夫冰炭
相乘利害交至隕真盜和豈獨陰沴道心惟微易失
難常因于侵陵保和以全天君故能涉至變而不濡
更萬變而常存蓋將窮年以齋居豈特養生而善身
乎

蜘蛛賦

魚游假淵鳥棲求木而我所宅獨取諸腹巢于墻屋
人不予取朝蠅暮蚊食人所惡彼殘物以養而無益
于世雖名人兮斯虫是愧

遺幽賦

居子：以無與兮出莫知其所之獨端居以終日兮
耿耿：而長思古之人不可得而見兮存者減畧之
遺辭顧一世之異情兮余誰者其從之惟我生之拙
迂兮嗟所慕之名奇挹廉清之遺風兮曰吾其進難
而退易百驅不加于跬步兮却轡疾返而莫追踐斯
言之不欺兮庶吾心之無愧日月忽其遷流兮老忽
忽而既來惟所蹈之日迷兮撫前心而自非欲改故
而圖新兮從靈龜而問疑兆改橫而上從兮史謂余
而告辭橫為窒而善處兮上從直達其無熾豈外物

而中忝兮或者既塞而將遂保尔守而無變兮神明
于汝其遺之相利害而為術兮彼鄉人其猶恥美靈
龜之告猷兮得我心之所止彼蹠：其安往聊安：
以自恃歲冉：以將老兮草木颯其告衰玄蟬號乎
高柳兮溢菡萏于清池宵虫悲鳴以相語兮朔雨振
迅而南窺嗟吾客于東周兮周天星之三移寫我憂
以命駕兮憑高明以遠視覽平田以蒞英兮瞰清洛
之東駛山重複而南積兮菓嶺矗：以鱗次微雲靈
霽以忽布兮孤翼滅沒而高逝熊耳高：而西峙兮
女几奮湧而南危束平川于兩間兮散佃漁于平地

雞犬密其相聞兮溝塍布而如棊牛羊閑以就牧兮
鳥鳥號呼以羣嘻登故國之餘墟兮望遺宮之頽基
傷者來世而無窮兮樂者昔人其既止惟達觀其超
忽兮等廢興于一視考物變以自樂兮遺餘情于酒
醴大人無即而非樂兮淺夫係物以自治彼方窘我
以局但兮我則顧步而廣肆制憂樂于在彼兮天何
貴乎明智忘吾憂以洋兮將以將語夫君子

宛丘先生文集卷第二

張耒文潛

宛丘先生文集卷第三

賦

得友賦 答子邕

余趨世之僻迂獨子：而無朋信所樂以直前嘗媒
仇而賈憎惟物態之多艱撫危心而自驚甘默：以
退藏包薄技而無成何吾迹之不常旅成周之故京
眷吾游之悠遠耿誰語兮吾情惟夫子之好脩昔固
聞乎德聲獨顧我而忘勤握未暖而心傾發捷鑰而
不疑奏金石之鏗理內端肅而粹溫外炳煥而清明

嗟我鄙而子奇謂欲合而莫能援古義而見交愧此
意之何勝既兩盡而莫疑亦交規而共評驅昔邁之
無餘撫新樂而生矜豈目前之歡愉實未得乎生平
惟清洛之名都窺園沼之清澄語寒堂之夜燭醉春
圃之朝英徵逸事于古初亦窮微而追精投明珠之
的歷報白璧之煌熒惟此樂之無窮使我愛日而兢
兢雖所歷之萬殊願勿疾兮茲誠

懷知賦

嗟余生之苦艱涉世故而多違至羣嘲而衆侮獨子
子其從誰嗟若人之好脩外洵直而中奇挈余手而

指津謂予車之不迷遵常度以夷行正六轡而安馳
嗟終日而無禽曰固然而曷疑惟言動之合符若方
圓于規矩振高言於皇極流餘麗于奇辭沃道德以
相鼎心厭滿而忘飢愛日月而畏別卒悠遠而多懷
政余望兮莫瞻將駕言其從之何出門之多艱頓我
馬以嗟咨山叢々而造天車欲進而畏摧臨江湖以
浮舟蛟龍鬱其揚鬢路幽迥而莫通心鬱塞而增悲
贈瓊瑤以致情恐所託之吾欺唯至技之難技或舉
世而莫知倘一遇而見明蓋至樂之無儷彼取舍之
迷方或骨肉而相遺苟我心之不察雖親愛而何恃

故烈士之報知己或殺身而不辭豈以生而易名誠
內激而忘思風蕭蕭以戒秋蟬嗷嗷而鳴悲白露團
兮夕涼庭木颯其先衰羈我馬于東周蓋三歲其於
茲老駸而來逼心鬱鬱而不夷顧所樂之莫從託
宵寐兮庶幾酌尊酒以忘憂寫我心兮陳詩

哀伯牙賦

伯牙鼓琴後世無如我哀伯牙似智而愚天地之間
四方萬里知爾琴者一人而已鍾子既死其一又亾
欲彈無聽泣涕浪浪已奏已聞欲語不可幅塞滿懷
無所傾寫折楊黃華卷歌里曲入邑娛邑入國悅國

回視伯牙面有矜色夫操至技者必不和衆人之耳
而媚衆耳者又善工之深恥違衆者常子其無與
而冒耻者乃身安而獲利則亦安知夫至藝之非禍
而庸工之非祉也嗟夫將為至巧者必無顧于終身
之無與則至巧之於人乃不祥之器操不祥之器終
身而不知則伯牙者乃後世之深戒

石菖蒲賦并序

歲十月冰霜太寒吾庭之植物無不悴者爰有瓦
缶貯水斗許間以小石有草鬱然俯窺其根與石
在結絡其生意暢遂顏色茂好若夏雨解穉之竹

春田時澤之苗問其名曰是為石菖蒲也考諸本草則所謂養性上藥聖仙之已試者也因賦之云
歲寒風霜水落石潔大木百圍僵仆摧折有草於此
寸根九節曾是莫傷葦然茂悅若處廣深隱奧密而
不知戶牖之外平地尺雪也將糜而餌之私其益于
我躬則不幾于奪也曷若致之吾前儀之以自修兮
庶乎比德之琚玦也

病暑賦

皇昌運之元祀兮予出守乎清潁之區背國門而南
駕兮弭楫乎太昊之墟方炎夏之隆赫兮閔時澤之

不濡魁乘時而行虐兮盜威烈乎暘烏駕畢方而驟
熒惑兮回祿為其前驅燼所及于一燎兮何有瓦石
與璫璣豐隆致其微陰兮飛廉蕩覆而無餘野曠
而揚塵兮何蕭艾之芬敷應龍矯首於下澤兮僅自
免于槁枯烏呀味而忘飛兮獸逃穴而深居嗟人胡
獨不能兮無乃欲息而被驅昔蘄山之秋筠兮困水
卷而玉舒効功能於么麼兮曾何足以寧吾軀飽風
而為蜩兮又欲泳水而為魚出寒泉於深井兮竭筋
力于轆轤不計腹之所受兮尚問山藟麴麥之有無
辭曰陰陽循環靡窮極兮時至而變有常則兮融液

金鐵爍山石兮謹視其報在朔易兮玄陰大冬冰霜
積兮無畏其機備其極兮補完裘褐戒紡績兮保我
歲寒以終吉兮

喜晴賦

積雨初止萬境聲乾星漢昭回夜客高寒晨起載欣
朝暉在門起往從之清明肅然蚓安其穴蝸不遺涎
還開通于滯濕失沮洳之墊昏列缺弭鞭豐隆偃麾
羲和緩轡而步行背扶桑而經天街顧大田之多荒
乃愀然而興哀聊雷霆之一嬉遽下土而罹災詔龍
螭使伏蟠息憤怒之喧墮曰余悔禍于斯人勞苦雨

師以一栢惠我農師豈不休哉

南山賦

贈張嘉甫

南山巖々兮其下有人佩玉而握珠冠意魯叟之古
經不習世儒之臆書我頃見之於宛丘貌秀哲而眉
踈別去忽分幾時面蒼瘠而垂鬚愛德器之老成資
巧篆于璠璣問所與之謂誰亦黃槁之仙癯禁八馬
之超鶩同菟豆於羣鴛時慷慨而長鳴恥賤工之附
輿我行世之多艱三年困兮江湖幸天恩之放還過
都梁兮躊躕奉兩月之周旋越長淮之馳驅屢飲我
于山間出翩躚之兩姝舟師告余以當行且篙楫于

斯須歲方暮而寒驕犯冰雪于野墟雲漫々兮垂天
風栗々兮攻膚穉楚翳于宿莽妍柳秀于羣枯泛羽
觴之清冷聊覽物以為娛思佳人兮天末望莫見兮
愁予

秋風賦

張子夕坐于堂之南軒有風颯然來自四方感乎人
心異于尋常初披偃乎草木亦泛動乎軒憲張子曰
是風也所以成歲而佐陽者乎時也朱火就謝七月
始涼既導迎于肅殺又紹介于雪霜其中人也萬竅
洒然汗澤為乾纖絺魯縞不勝其單其加物也未敗

其形先傷其情未隕其生先奪其英使之嗒然委者
見于顏色黎然槁者動于聲鳴吾嘗中夜聽而之淅
瀝颼颼羣動百虫怨泣悲吟感人忡々者秋之聲旦
起而望之清明高潔者秋之容于是庶草効實九穀
獻功既彌于野又嘗于宗感天時之不留念歲律之
將窮張子曰吾何為乎戒裘褐以備嚴冬而已

南征賦

贈張嘉甫

予文窮而莫諱兮顧四方其何適母寧征于江左兮
毛上膏其可食抱朝暮之勝氣兮西山吾以為宅風
余帆于晝日兮余朝發于赤壁標玉壘之下流兮逝

蓬飛于一息迅沮漳而橫入兮匪揚瀾與左蠡寧吾
目無恨兮濤猛獸以噬獍霽光風于木末兮俟餘波
猶未肯平迷失道而問津兮御于朱明就渙父而陳
詞兮余非湘纍之獨醒父告予以不治兮南樵舍而
自成破隴畝而溢流兮石險狼而當道豈舟人之肅
洽兮艇觸撥而欹倒繫余車于桑木兮猶可以徒行
夷予竈使不得炊兮余猶可以乞鄰四厚土之淤漫
兮予騷：無以為家雖斯懷之可人兮鳥猶長鳴而
歎嗟黃蒲田之所播植兮歲有秋而登場既狼戾而
竭鄰兮已獨賦乎廩倉饌上方之玉盤兮上曰飽斯

人之德歲協洽而斬兮味柔嘉余未得食染予指于
鼎兮豈不同此臭味使持節於十郡兮民得此父母
顧余懷之倉卒兮謂一寒之何故雖解衣推食兮曰
此小惠汝弗德我：世之良醫兮藥神膏而可以破
汝腸賦余九言而九頓首兮度百世而足用閱一世
之風波兮曰餘皇吾以為歸宿

碧雲賦

蹇臨高而延矚悵天邊之碧雲緬不知余何思情至
至今繽紛懷幽蘭之令姿方揚靈乎上春顧采者之
非其人使暴露乎埃塵我有旨酒與子慇懃終澗莫

致實勞我神白日西馳去故就新發采舒光念當及
晨

三酌賦

出公門而偃私酌旨酒于良辰緬再酌而三酌恍如
對乎佳賓畏局促之傷懷聊流暢乎心神懲荒酒乎
無算悠然合乎禮文蕩志文史晤言詩書世醉不足
我醒有餘願妙物表韜精道樞冥會獨應誰知我娛

人日飲酒賦

歲後七日其名曰人愛此嘉名酌酒歡欣豈木竹之
始和生度彙而施仁又曰人者三才之中將中和之

肇布易嚴殺之餘冬也乃命婦子班坐行觴酌已相
祝壽考無疆有否必泰無窮不通請觀庭下之枯折
霜霰消而敷榮羽虫感陽而羣嬉况乎雲間之飛鴻
于是三酌既醉喜有所得安局促而不歎悟倚伏之
無極

吳故城賦

亂吾舟兮大江夕余濟于樊口登武昌之故墟吊西
門之衰柳出東郊而南眺訪遺城之培塿嗟頽墻之
迤靡半已平乎耕耨雜谿澗而沮洳稻冉々而將秀
曰是吳王之故宫兮昔孫仲謀之所有當樊漢之委

地羣凶聚而啄剖偉紫髯之永圖獨穴據乎江右豈
無意于雍洛易虛夸為善守觀其作都于武昌夫何
險陋而即安是為大江之上流兮於備敵焉不繁顧
諸將之凡才豈袁曹之敢班欲身當中原之一面兮
便時利一葦濟乎濶瀾當是之時兩觀萬雉縹關應
門內擁燕趙之容外屯魏魏之軍笙磬鼓鐘之喧闐
旗旆車馬之繽紛固已包蒙川澤震耀山原安知夫
千載之後陵谷易位夫何遺珠與棄玉顧此遺墟之
將圯于是與客休于祠宮披樵蕪之微路嗟牛羊之
入室固牲酒之不具與客愀然三歎而去

余近讀曹植諸小賦雖不能縝密工緻悅可人意
而文氣疏俊風致高遠有漢賦餘韻是可矜尚也
因擬之云

宛丘先生文集卷第三

宛丘先生文集卷第四
次韻蘓公武昌西山
靈均不醉楚人醅
秋蘭蘼蕪堂下栽
九江仙人棄家去
吳市不知身姓梅
東坡先生笑二子
一丘便欲藏崔嵬
脫遺簪笏玩杖屨
招揖魚鳥營池臺
西山寂寥舊風月
百年石尊埋古埃
洗尊致酒招浪士
荒墳空餘黃土堆
但傳言語古味在
一勺玄酒藏山壘
鄧公歎息為摩撫
重刻文字蒼崖隈
五年見盡江上客
兩

宛丘先生文集卷第四

古詩

次韻蘓公武昌西山

宛丘 張耒 文潛

靈均不醉楚人醅
秋蘭蘼蕪堂下栽
九江仙人棄家去
吳市不知身姓梅
東坡先生笑二子
一丘便欲藏崔嵬
脫遺簪笏玩杖屨
招揖魚鳥營池臺
西山寂寥舊風月
百年石尊埋古埃
洗尊致酒招浪士
荒墳空餘黃土堆
但傳言語古味在
一勺玄酒藏山壘
鄧公歎息為摩撫
重刻文字蒼崖隈
五年見盡江上客
兩

履踏遍空山苔謝公富貴知不免醉眼來為蒼生開
長虹一吐誰得掄六融故在何曾摧橫翔相與鴻顧
鴈寶劍再合張與雷山猿澗鳥汝勿怨天遣兩公聊
一來豈如屈賈終不過詩賦長遣後人哀

聞蘓先生除校書郎喜而為詩并招王子中
績溪仙翁若秋鶴有喙不向腥羶啄幾年戢翼大江
南下看紛々飛燕雀親携杖拂呵禪祖自伐松根出
靈藥世人真自為公忙公寧有意人間樂嗣皇繼明
登俊彥詔遣讎書天祿閣江山氣象滿收貯傾倒歸
來開萬橐咸韶無聲嗟已久野鼓羗絃自宮角當令

鸞鳳見文章却遣丘陵仰山岳王郎蕭々好文筆一
世清名推衛樂嶺頭梅發始辭家坐見長安秋葉落
滯留窮縣許過我季心不負千金諾何為歲晚尚遲
留庭下寒篁還解擇我老栖々亦何事一官未足充
藜藿讀書把筆工無益執板折腰心已忤頑踈一味
難鞭警妙道多生欲穿鑿惟君所事與我同他日相
從鄭君學葛稚川投道鄭君子
由先生於道深矣

寄子瞻舍人二首

皎々連城壁實惟天地珍足傷曾不售寶氣終氤氳
山川媚餘秀星斗攬奇氛終然不可掩三浴被埃塵

天王齋戒受嚴庭具九賓貯之黃金臺藉以九龍茵
事稱忘禮厚人誰駭其新車輪走四方爭覩快一陳
無瑕故易傷歛暉志乃神

紛：名利場向背不知醜翟公書其門客態自如舊
勢去競詆沮有餘丐升斗高賢少畦畛小子多狀候
退之呼字生房相彈琴叟事奇出意表欲辯不及口
神明勞忠孝福祿日方厚防微無早計求福常恐後

次韻蘓翰林送黃師是赴西浙

昔見君納婦今見君抱孫先公力種德子合大其門
何為亦如我有抱不得言崢嶸胸中氣默々自吐吞

誰如東坡老感激論元々欲將洛陽裘盡蓋江湖村
既係海若頸又鞭江胥魂意令仰天民不隔頂上盆
我獨乞禪牀一氣中夜存

和登城依子由韵

步登高城望望々殊未已惟時歲將窮冬孟月魄死
紛吾方有懷一坐為三起悲歌繫枯枿聲與淚俱至
人生隨大鈞命不貸君子付之無如何外垢資內洗
前知踐終吉外頗與愚似開門張瓊瑤誰者目不寄
支離冒多福嬋娟畏獨美舉頭蒼天高歎此青雲士
酌公芳尊酒願公百憂止履善神所勞委置目前事

泊南京登岸有作呈子由子中子敏逸民

客行歲云暮孤舟衝北風出門何蕭條驚沙吹走蓬
北涉濰河水南望宋玉臺落葉舞我前鳴鳥一何哀
重城何誼：車馬溢四郭朱門列大第高甍麗飛閣
湯：長河水赴海無還期蒼：柏與松同原常不移
覽物各有歎誰者知我心口吟新詩章手撫白玉琴
感我情一奏涕淚零鳴琴伯牙久已死何人為我聽
推琴置之去酌我黃金壘幽憂損華姿流景良易頽
讀蘓子瞻韓幹馬圖
我雖不見韓幹馬一讀公詩如見者韓生畫馬常苦

肥肉中藏骨以為奇開元有臣善司牧四十萬匹屯
山谷養之罕用食之豐力不曾施空長肉韓生圖像
無乃然我謂韓生巧未全君不見昔時騏驥人未得
飢守監車唯有骨昂藏不受塵土侵伯樂未來空佇
立騏驥乏食肉常矍韓生不寫瘦馬駒誰能為驥傳
之圖不知凡馬飽青芻

再和馬圖

我年十五游關西當時唯揀惡馬騎華州城西鐵驄
馬勇士十人不可羈牽來當廷立不定兩足人立迎
風嘶我心壯此寧復畏撫鞍躡鞚乘以馳長衢大呼

人四走腰穩如植身如飛橋邊爭道挽不止側身逼
墮壕中泥懸空十丈才一擲我手失轡猶攢蹄回頭
一躍已在岸但見滿道人嗟咨閨中地平草木短盡
日散漫游忘歸驅馳寧復受鞭策進止自與人心齊
爾來十年我南北嗟：此馬入誰手楚鄉水國地卑
汙人盡乘舩馬如狗我心未老心已衰夢寐時：猶
見之想圖思畫忽有感况復慷慨吟公詩達人遇境
貴不惑世有尤物常難得寧能使我即無情搔首長
歌還歎息

寄子由先生

先生四十猶不過獨坐南都誰與語青衫弟子天下
窮飢走京塵困羈旅高門得飯暫見肉樊筐無實惟
巢鼠樓頭酒貴不敢沽三百青銅輸杜甫強顏講學
昧時宜謾自吟詩愁肺腑平生不辭謁貴人况乃令
嚴門者拒此生自料應常尔但願流年醉中度又思
人世樂乃已此外紛：何足數預期歸日在涼秋想
見西風蕩煩暑區：懷抱莫披豁一尊駐願東歸櫓

和定州端明雪浪齋

中山士馬如雲屯號令唯覺將軍尊熊旂犀甲羅左
右金鉦鳴鼓誼朝昏少年畎畝老為將誰能復記躬

耕村東坡先生事業異道峻不得安脩門眼前富貴
念不起唯有山林勞夢魂榛中奇石安至此坐蒙湔
洗見本根奔流驟浪勢萬里至畫乃掃筆墨痕黃牛
三峽固細事赤壁長河何足論能令萬古蛟蜃怪么
麼入此玻璃盆扁舟獨往則不可平生致君言具存

歲暮即事寄子由先生

歲暮淮陽咨貧閑兩有餘朝昏面壁坐風雪閉門居
老去深依佛年衰更嗜書未能忘素業聊用慰窮途
下里皆貧屋開門即古墟雞豚來近舍春汲賴鄰夫
雪壓移來竹霜萎自種蔬烏皮蒙燕几褐帽裹僧顛

中是七律者因
後詩同篇能山

肉似聞韶客齋如持律徒女寒愁粉黛男窘補衣裾
已病藥三暴辭貧飯一盂長餅卧墻角短褐倒天吳
宵寐衾鋪鐵晨炊米數珠火樵隨杜脰葛製暖寒軀
時命今如此功名已矣乎談愁風射馬拙待兔逢株
久慕真乘樂深詣夢境虛誰怜九頓首正有一長吁
瞻望身空老蒼茫歲欲除何當聞妙誨點刑待完膚

再寄

宛丘之別今五年汴上留連才一日賤生飄泊客東
南憂患侵陵心若失先生神貌獨宛然但覺岩、瘦
而實有如霜露入秋山掃除蘂蔚峰巒出自言近讀

養生書頗學仙人餌芝朮披尋圖訣得茯苓云是松
間千歲物屑而為食可不飢功成在久非倉卒上俾
金石免毒裂下比草木為彊岬消：漱納白玉津鍊
以真元納之骨神仙自是人不知豈為難求廢其術
我聞公說心獨嗟欲聞太虛窮恍惚奈何不使被金
朱乃俾枯枯思岩窟又觀世事不可常倚伏誰能定
於一終身軒冕亦何賴况有朝升而暮黜何如端坐
養形骸壽考康寧無夭屈乃知豈即非良圖却笑兒
曹嗜糠粃青衫弟子昔授經賦分羈窮少倫匹自知
無命作公卿頗亦有心窮老佛但思飽暖願即已安

意功名心實不終期策杖從公游更乞靈丸救衰疾

次韻蘓內相好頭赤

世無將軍飛食肉宛馬不來鞭費竹赤駕當御亦偶
然冀北此曹量計谷慙愧蒲稍汗流赤翻鬢胡風嘶
漢日麒麟不合地上行誰道風雲未經歷

題東坡卜筮子後

蘓先生責居黃州嘗作卜筮子云缺月掛疎桐漏
斷人初靜誰見幽人獨往來縹緲孤鴻影驚起却
回頭有恨無人省揀盡寒枝不肯棲寂寞沙洲冷
因題此詩

空江月明魚龍眠月中孤鴻影翩、有人清吟立江
邊葛巾藜杖眼窺天夜涼月墮幽虫急鴻影翹沙衣
露濕仙人采詩作步虛玉皇飲之碧琳腴

聞子瞻嶺外歸贈邠老

今晨風日何佳哉南極老人度嶺來此翁身如白玉
樹已過千百大火聚皇天留之付真主世間毒烈計
已誤柯山潘子應鼓舞與子異時從杖屨

次韻秦觀

琬琰非世珍昔以羊皮換嗟君復何求衆棄乃所玩
十年少游兄閉口受客難二毛才一第俗子猶憤惋

人間異巧拙善琢貴顏汗嬋娟守重閨倚市爭倩盼
君胡寶滯貨屢辱訪衰懦譬猶臥仆塗更侑觥與散
球然瑚璉質磨琢爭璀璨遲君三年鳴更用驚我漫
魯直見和前詩再用韻

濟物非僕、功名愧無心倚市安能美汲泉不厭深
老人夙有尚餅鉢好叢林安能紅塵裏徒使老駸、

次韻答天啓

黃鐘無聲登瓦釜蔡子青衫在塵土逼人爽氣百步
寒知子胃中有風雨三年河東走胡馬絕口魚鮓便
酪乳歸來萬卷付一讀不學兒曹用心苦周瑜陸遜

久寂寞千年北客嘲吳語莫徒彩筆雲錦張要是寶
劍蛟龍舞天兵百萬老西北快馬如飛不出戶眼看
六纛出麒麟走取單于置刀俎

赴亳州教官次韻和中書錢舍人及亳守晁

美叔見贈

久知踈慵難應接勉疆一官親訟牒羈窮正似鳩無
巢擺去不如魚有鬣從來書史鈍蹊徑更歎詩騷窮
事業幾思狐白易絮纒羞褫舊服求新袂又憐夸毗
竟何得把玩區：一蚊睫久知趨向合飢寒正藉文
章謾嚙囁紫微丈人椽作筆誰得羸師輕傳謀知擒

敢慢武戾縱有奔前知魯戾斂荒蕪滿編求指摘望
以餘光分曄曄乃蒙稱屈力褒揚不意糞壤藏諸篋
獲如丘陵飽則可良御不悅猶非獵平生賞遇有君
子處世雖鈍吾知捷清閑得食學官祿願以詩書填
吻頰牙懸喜校勦戾蠶藤織新成沈郎笈晁公聲名
三十載餘事筆蹤傳法帖紫芝眉宇望不遠屈指數
日無旬浹黃衫健步書見賜紫誥除官等何躡久懷
薄技待後乘宣管盈囊紙來欵坐垂前計空惋悵袖
裏從今雙手壓醉歸應被官長瞋未飽徒勞方朔獵
蘓叔黨呂知止自許下見訪叔黨有詩戲贈

以此奉答

三年齊安看江山可當中原故人面
北來塵埃逢故人眼前却作江山見
君似江山定不踈能出吾言世亦
無蘓卽下筆妙無敵呂卽與談驚未
識鳳雛驥子未宜輕囊空各有千金
璧贈君錦繡英瓊瑤報我琅玕金錯
刀溪毛潢沔未相棄歲暮與君甘緼袍

和楊念三自武昌至京師

三年別我客荊州一日長安從我游
愛君詩有春草句使我神游黃鶴樓
江山望尔欲穿眼見我驚嗟秋鬢短
扁身可辦吾欲東年來五湖魂夢中

和周楚望

宿雨生曉潤繁雲滋暑陰我居廢不
葺常苦積雨侵果墜厭風惡草沉知潦
深拳拳抱幽歎耿耿嬰煩襟吾子久不
來幽居誰見臨飄然得秀句生我江湖
心一官亦漫尔勤苦安能任可當捨之
去拂我塵埃琴飢寒仰五斗求尺而忘
尋悲哉復契濶誰復知吾音

和陳器之四詩

朝應天

應天寺有五聖御容官于洛者至則首謁

唐衰五季更披猖社稷反手看興亡
山河分裂流戰血積骨被野號豺狼
中原正朔不出境九州豪傑爭

侯王生民禍難究痛極腥穢上達于穹蒼真人龍飛
萬物觀天命自至誰能當靈旗指揮四海一氛祲殄
滅和風翔降王賜第奉朝謁九服効職爭梯航百年
積累到今日運祚方與乾坤長佛宮原廟廣孝敬嚴
致守衛懃烝嘗陰：祕寢鎖遺像蠹：畫戟羅蕭牆
衣冠具列虛仗儼龍駕不反遺弓藏子孫億載千萬
世永與清洛流湯：

過韓城

周京無人弔禾黍七雄按劍分周土秦人匹馬出函
關六王割地愁為虜宜陽古堞故韓都城接疆秦爭

戰苦謀窮運去竟亡國從長蘓秦亦何補諸侯已盡
秦魏：嬴氏已亡秦不知始皇自是呂家子宗廟薦
享真何為山河百戰移陵谷宮殿成塵埋寶玉秋風
壞塚長荆榛落日空城散樵牧今古悠：共一丘爭
疆蝸角欲何求誰似令威仙骨健千年重向故鄉游

弔連昌

唐日西頽半明滅長彗掃天流戰血六龍不復入東
都唐自安史後至昭宗東遷終不復幸連昌已有狐狸穴宮前苾：洛
陽路漢甲胡兵幾回度火焚馬蹙百戰場盡是舊時
歌舞處游魂不歸宮樹老茂陵金玉人間寶春耕迤

遷上空山夜燐青燐照秋草女几喚：青挿天東流
洛水自潺湲興亡一覺繁華夢只有山川似昔年

鹿仙山

真人朝天去不還千年鹿跡留空山空山寂寞何所
有野殿荒涼松檜寒桑田海水移今古興亡萬變誰
能數五雲深處駕飛龍應笑人間換朝暮神仙不與
世人期騎鹿安知不復歸朝嵐夕靄山秀潤應有靈
丹相護持長生可求仙可致浮世醒曠何足嗜君不
見漢時九江梅子真一日辭家隱吳市

次韻君復七兄見贈

老知山林等朝市扁舟誰能問行止長淮十日浪吹
沙春風正覺驪龍睡幽人軟語破永日衝泥携手林
間寺坐中知兄病當已眉宇盪：有佳氣華池神酒
不用醒人生和暢自忘形扶持陰德鬼神在洗除世
緣煩惱輕東來自慙雙鬢改相逢獨覺兩眼明論詩
尚愛淡生活學道久歎閑名聲嗟我塵埃費昏旦補
刑自矜聞道晚還丹欲問僕：仙謂陸先生僕也一菴
更伴騰：睡騰：古禪春陰夜薄月朦朧劇談燭盡
宿謂圓明
尊亦空他日重逢麗處士可能猶與世人同兄緜愛
屏欲專

意禪悅故
比麗公

答仲車

先生居山陽時事不掛齒讀書逾五車不肯著一字
今朝苦歎嗟告我老將笑至我意與子殊欲去依禪子
次韻子夷兄弟十首

暑雨衆物成園林架垂實官閑糜歲月禪補百無一
委身作書蠹檢性就僧律古味雖未止塵埃滿琴瑟

又

金馬聊代耕漫郎亦為官何必歌五噫遭非如伯鸞
物生各自遂蕭艾與芝蘭詩人亦多事屑、計鶉羶

又

惜：坐歲晏忽枉故人書頗說清淮濱卜築有幽居
歸興浩滿懷端如果收狙功名繫遇合不遇欲何如

又

出門復入門愧此櫪上馬壯心磨不盡撫劍還悲咤
感時高歌放泣古幽淚洒端憂蹇無成駕言我心寫

又

少年初入洛見謂醒日少春風牡丹市走馬帽簷倒
知音君伯仲騏驥與腰褭五年復相逢但怪酒醜小

又

經時不飲酒廩薄入口衆人間多是非不敢盜鄰甕

二公洛陽日相見飲屢痛行求放湖海種秫代官俸
又

閑官冷于水塊坐守編簡時無蘓司業何處見酒巵
新涼枕簟瑩付睡與雙眼念我南山苗經年廢鉏鑿
又

文園得武皇引疾常避事佳哉意殊深遺迹邈不嗣
揚公漫投閣不禁問奇字致身毀譽外乃得免疑似

又

呦々中林鹿那得伏鞍銜愧我蕨薇姿塵埃敝朝衫
山人不歸山頗被猿鶴諛欲追甫白將千古感至誠

又

昔有獨醒士絕口避綠標折楊得衆笑無地至秦青
周詩念忠嘉所貴食野草良時不可再佳人難合并

同楊二十緱氏寺宿草酌張正民秀才見訪

契濶千里別惻愴難具言慙慙一宵語願子未即眠
空堂燈火青旅褐借僧氈勞々一杯酒不辭道路寒
經年相從樂既別亦茫然人間事盡爾聚散亦何嘆
但悲多難身尚獲朋友歡間閔百憂中一笑直萬錢
張子年未冠已雄羣少年晚々坐我側紫眸秀雙顴
壯志激衰懦清談破愁煎天明即分散奈此情悄悄

客過

歲窮北風卷平楚張子畏寒深閉戶扣門過我者為
誰束帶出見亦良苦俛眉謂客子勿嘆我心善煩勿
多語天寒酒賤曷不飲安用造請勤如許

謁客

入門投謁吏翩：我非欲見禮則然異哉賓主兩無
語客起疾走如避燃我已不恭愧昔賢忍使塗炭朝
衣冠人生暫聚鴻集川春風吹飛何後先

迎客

城門抱關者老兵問客來早天未明我笑老翁勿嘲

訕我愧古人百千萬道傍燁：翁所見寒熱郡國欺
鄉縣人之所畏敢不畏嗟我與翁安得慢

喜吉老甥見過

西風吹藜藿秋色滿環堵悲虫語窻月陰藥開夕露
門閑賓客少鳥雀任散聚楊甥時過我論詩朝達暮
新茶磨細雪甘井漱清乳匆：貧家飯藜藿不滿俎
頗言行有日征艱下洛渚喜汝將鳳歸驚余髮加素
老慵愁應接兒女較口語樂逢親骨肉情話到爾汝
先君外孫子惟尔冠侯：平生女類兄宜爾有風矩
長安木葉落雨送萬家暑涼風當沽酒為我醉起舞

宛丘先生文集卷第四

宛丘先生文集卷第四
詩
...

宛丘先生文集卷第五

古詩

贈蔡彥規

張耒 文潛

我不見蔡子杜門十日餘今日扣我門滿手携瓊瑤
鏗鏘寫我前雜以貝與珠我愕不知報低頭驚且吁
讀畢致于懷餘光溢衿裾坐令簞歎室磊落堆璫璆
我拙寡所合甘為不才樗嗟君何所聞屢枉長者車
我來淮南游藹藹子之譽驂韶走千里凡馬安能逾
奈余不自量痛鞭而疾驅常憂過所任樊憊傷吾軀

願君少待我且欲休吾駒跳奔捨其羣子樂誰與俱
俯身援其類是亦仁之徒不然但困我畏甚將逃遁
何如少貸之効技供子娛我無功名願與世日益踈
反慕古沮溺窮年事耕鋤皇々吾夫子憂世亦勤渠
雖然竟何就孰若安以居人生各有懷未用相賢愚
得樂願即止安能較錙銖又疑異所在勞逸事亦殊
作歌以訊之子意當何如

寄陳九

別來常思君無異飢待哺如何偶相逢握手復告去
念初別子時芳草才及屨天時不可留再見歲云暮

出門怪子瘦昔我困道路飄々千餘里陸走復水泝
古來黃金盡壯士色亦沮斯人獨何少乃有衣食慮
才高窮不怨志大貧若富吾將告君理子聽我其語
人生不終窮否泰亦有數子其保所有雖穎囊必露
古來立功名其始不無忤得難失自寡進銳退亦遽
念君歸海濱誰與朝夕聚我方困而學每冀朋友助
一從城北歸魂夢見已屢願因南來者時以尺書寓

呈徐仲車

朝日照高簷夜霜猶在瓦纖々墻邊柳春色已可把
殘年能幾何奔駛劇湍瀉雖無功名求衰暮亦悲吒

出門問徐子兩計決取捨為當勉自修汲：不可暇
為當飲美酒送老在杯竿子當指我途我即策其馬
但恐懶拙姿終非服勤者

贈敦復

敦復想為詩日見無全牛天工忌其才小邑使拘囚
漫塗以塵埃訟訊羣嘲啾尚於紛紜中逸興時奔道
不知誰使之暫爾為南游驂駟解其繫鷹隼脫于韝
山川困搜羅風月遭嘲咻舉手聊探之縱橫爛琳瑯
又有同行人更而迭辨鼎天應憫子勞久苦暫使休奈
何少縱之一放不可收歸來見我喜逸氣凌高秋我

竊不自量妄將覽其輶心知不可追子幸為我留君
方嚴旗幟我亦戒戈矛將圖詰朝見百敗非予羞

贈江瞻道

我行於四方其所急者友嗚呼得之難百不一邂逅
人心不可齊若十指于手隨其短與長亦各有所取
剛或礦而折柔有弱而仆質良文不揚中美外莫副
寬壺泛以枵狹盞迫而陋此猶其大槩瑣屑難悉究
譬如選長材棄百不一有其間雖得之猶或煩矯揉
我友居淮濱飲德昔自幼豈期羈旅間乃獲聞謦欬
嗟君如美玉外徹中乃厚埋瘞困塵埃要以不可垢

他人十不一子乃得八九餘虧能幾何不待勉而就
乃知昔求艱特以見未久但憂奔莫及敢憚喘而走
我心子所知濩落無所圖是以行于世徃得嘲詬
人才如其面不自知好醜立之明鑑前乃見其可否
子于我無嫌告我當苦口我惟于改過竊不敢自後
嗟予迫飢寒子亦仰五斗何當兩有歸投老作鄰叟

劉伯壽秘校

將軍卷金甲獨卧高山阿千金買蛾眉晝夜飲且歌
時平武庫鎖賂買戎狄和不復用英雄惜哉雙鬢皓
延我寒夜歡清尊不辭多壯氣老未已醉來鬚屢摩

克國年七十立功未蹉跎我欲勸公起拂塵揮舊戈
公言一世中歡樂能幾何安用身名外功高竟消磨
家住太室陽開門對嗟我嘉肴薦尊俎有酒如江河
度曲得新聲詞成自吟哦樂此常不足尚安知其他
我愕不知答高賢固殊科馬援喜功名旅死遭譏訶
陶潛雖放情但為碩人適公於二者間安處行逶迤
寒廳有脩竹野泉漲微波不厭徒馭勤高車幸來過

贈張公賁

我昔為諸生奉書諫議公後來辱稱獎禮數賓客同
決科用弱冠年少氣如虹歸來陪後乘不責醉後恭

孤舟梁宋郊旅態萃百窮拜公睢陽府笑語若春風
人事不可期俯仰異吉凶平生丹竈術馬鬣哭新封
十年得吾弟懷舊涕沾鬚清貧守家法眉宇肖德容
交臂是非外為寮兄弟中東軒語長夏葵竹羅青紅
西舍雪夜歡玉顏醉瑤鍾欲飲徑相就三更叱閤翁
鯨吸絕遺滴山頽信傾峯搜抉盡醬茹楂梨倒筐籠
通宵兩沉醉午起頭如蓬人生定當爾事去挽驚鴻
河梁繫君馬一笑喜相逢伶君碧紗幌夜淚哭草叢
我方困壘鹽酸寒官辟雍同尋舊游地塵壁罨絲虫
啼鳥古寺閑夏陰小園空酒市逢好琵琶失玲瓏

歌舞一分散賓僚亦西東忘情猶一歎齊物論非通
官冷隱朝市端能信余慵人生當富貴子盍自磨礪
便當引五車一貯心胷功就蠹作堙叢成蛇化龍
北郊分袂歸作惡驚兒童長謠代晤語發子一笑哄
贈無咎以既見君子云胡不喜為韻八首
平生懷想人握手良未易接君同舍歡此事非此世
十年淮海夢一笑相逢地投分白首期願言何有既

又

賢愚譬觀形美醜不自見醫肱待三折劍鐵要百鍊
磨君古青銅汰棟寄明辨一智出千愚食芥敢忘獻

又
文風還正始磊落有諸君長者進後生亦使我有聞
譬如狸與虎偶使並稱文終然不可及因我力空勤

又

文衰東京後特起得韓子支撐誹笑中久乃化而靡
籍泥既洒掃後生始歸市垂君拯溺手請効我一指

又

詩壇李杜後黃子擅奇勳平生執羈勒開府與參軍
舉詩秉筆徒吟哦謾云：安知握奇律一字有風雲

又

觸有羸其角進有跋其胡膏車秣吾馬白日在脩途
雖乏無何杯頗多未見書力學致事功良田本深鋤

又

黃子少年時風流勝春柳中年一鉢飯萬事寒木朽
室有僧對談房無妾持帚此道人：事誰令余獨不

又

南山縛虎師肯顧世書字揚眉蛾楚喉鼎伴倒戾喜
詩聲一蒼蠅下到霹靂耳庸：老尋常物外有奇偉

贈楊念三道孚

黃鶴樓前月清輝千里寒娟：過江送子到長安

長安百萬家車馬無時閑中天聳觀闕四海會衣冠
矜尔薜蘿子豪華駭新觀蕭蕭囊中句飢坐奏清彈
漫即久不愜逸思生風翰寄聲武昌魚欲從傖父餐

贈李德載三首

我家外翁天下士欲以文章付孫子愛君牛角已食
牛屬書筆下無停字願君飽讀大父書學到莫憂名
不似重教我輩見風流更以餘波變鄉里
長翁波濤萬頃波少翁嶮秀千尋麓黃郎蕭蕭日下
鶴陳子峭峭霜中竹秦文倩燥舒桃李晁論崢嶸走
金玉六公文字滿人間君欲高飛附鴻鵠

男兒當讀五車書輟業應須蓋棺日人生事業要彊
學譬彼欲耕須待濕李郎落奇丈夫美玉應須作
圭璧請將便腹包五車汲講摩如救疾

同毅夫賀無穀教授

吾聞冤胸民盜若春竹笋異時用武吏搏擊縱鷹隼

洋劉太守

貢甫治曹不用刑而盜衰

豈弟發素蘊凶年盜乃滅

見謂君子敏先生衍詩書循吏副憂軫庶幾從風靡
少緩束濕縈君家厖眉伯學行我標準捧書見華髮
應為一笑聽

贈張嘉甫

浮舟大江里三千歸掃先隴清淮孺杜門古寺厭岑
寂夢寐清潁如家山汝陰昔謬稱刺史自愧何術甦
洞瘵平生為吏甘淺拙敢作姦賊傷民田未憂懷輒
擊之去乃欲築室買一壘簞歎三畝易辦耳寄聲父
老不汝干長淮清冬龍蜃蟄放舟出郭天宇寬浮梁
橫前孺可纜金塔却立儼莫攀髯張幼好此奇服白
壁刻珮鳴玦環抱持微學不忍棄清明竹寺遭剗刪
三年江湖友魑魅一日寶府觀瑜璫漸消鄙吝心自
喜追計存沒涕亦潛尋山把酒豈易得客路霰雪衣
裘單塵埃可洗憂可豁待君一勺玻璃泉

贈馬十二時全玉公檄過楚頃刻而別

我離海邊方季夏子時別我西亭下是時積雨河水
深卧看孤舟放清夜爾來忽：冬已闌歲晚荒涼學
官舍那知復與子携手猶能頃刻聽清話來時綠樹
今黃葉須信丹顏暗中化別離易得當重惜歲月難
留足悲吒人生坎軻多憂娛萬事紛：少休暇况予
飄泊不可常幾度相逢即衰謝功名 命何足求富
貴無常求亦乍隋珠彈雀雖有獲織塵未補千金價
我于世事甘不學久師璧觀依僧社辱君指我曹溪
源行雖未至寧辭駕君如有志反丘壑即我求田買

桑柘下鄰文室聽談禪更問老農求學稼

宿龜山寺下贈旻師

淮流赴海何時窮我生飄泊西復東山中老僧舊相
見驚我非復當時容三年歷遍百憂患遷就汲：如
飛鴻人生易老古所歎如我安得顏長紅塵埃漫滅
舊題壁枝葉已拱當時松我方奔走師已老更念別
此向時逢眼者故舊懷抱好宴坐不覺聽山鐘長淮
月高人語絕唯有塔鈴鳴夜風

贈吳孟求承議二首

我生仕宦求餬口敢憚水浮蕪陸走竭來京口見花

落歸去西風未吹柳山尋北固初知路水飲中冷未
盈缶徒勞結束解書劍未覺塵埃生戶牖瓜洲澄江
曉如鏡照水自覺秋容瘦因公忽致舊酒壺恍如夢
覺南柯守

我非初平叱羊口江中浪作羣羊走金山五日厭僧
粥揮榜瓜洲纜古柳晨興但怪妻孥喜故人致饋羅
盤在起傾殘榼得餘漑洗醜自酌開蓬牖風雲慘淡
秋已嚴桑榆搖落山初瘦軍厨醇味尚煩公應記踈
慵窮太守

贈晁二

走筆約無咎同赴大尹
龍圖四丈羔酒之集

昔者與兄城南鄰未省一日不相親誰令儻舍得契
濶此事我每愧古人逾旬寒熱不可說遍體最：生
赤鱗是身非有病亦幻調御未伏猶酸辛布衾蒙頭
但欲睡瞥見簷雪如飛塵豈無杯杓與鼎臠口苦未
肯親芳醇平生相逢百不問斗酒倒盡才逡巡崎嶇
行世得皆妄嵬峩就醉事最真殘年崢嶸欲無日晴
雲浩蕩已有春柳黃梅破最佳絕京兆羔酒仍慙慙

十二月二十六日作

未寒熱伏枕已數日忽聞車騎明當按轡睡
中得韻語數句上呈四丈龍圖兼記至日之

飲

山羊卷酥如切玉剪毛胡羊花作肉燭前醉客淋漓
時山泉更煮如珠粟深泥三尺歸不記日到牀前初
睡足爾來七日戰寒熱朝飯齋糜不盈掬客來但辦
君且去卧聽消：雪消屋因山事嚴京兆出十驛人
人如在目馳裘便面行野時晴郊已動陳根綠

贈晁十七

應之風骨世絕倫濯：芳柳當青春瓊瑤冰雪照一
坐我恐子是神仙人十年聲名望不見一日邂逅情
相親安仁白璧絕瑕玷宗之玉樹無埃塵襟清骨明

遇事歛西河舊政傳諸民縣門高開吏束手訟至立
決如有神別家還家况若失咫尺莫見徒為鄰會期
殘春再携手滿引大醕無辭頻

贈翟公巽

我昔出守來丹陽江流五月如探湯史君之居在山
腹繞舍樹石何青蒼千年藥根蟠井底靈液浸灌通
寒漿人言枸杞精變狗夜吠徃：聞空廊金山蕩瀟
浪花裏一舸遙去隨漢郎最奇岩齋人迹少乳水時
滴白石林翠龜坡陀負日色白騎掀舞占風祥我留
金山凡十日窮探力取無遺忘南風吹我渡江去已

厭淮南塵土黃二十年間多少事身如瘦馬起復僵
淮南窮棲衆人後朝食不充藜苳腸公來衰顏得一
笑側聽高論驚尋常窮閭過我坐至暮蒲懷珠玉無
糝糠乃知世間有清議未可盡以已意量精金白璧
天所寶理無破碎委道傍半年耳冷不聞此遇公矍
然神激昂論交自顧已老醜從事理絕隨飛翔斯文
有屬不但爾因公作詩我涕滂

與潘仲達二首

東風沛甘雨百物一時好江南桃李盡紅紫到百草
道傍負檐子寒食歸祭禱念我淮上丘三年不躬掃

淮陽牡丹花盛不如京姚黃一枝開衆艷氣如削亭
亭風塵裏獨立朝百夢誰知臨老眼得到美葵藿

宛丘先生文集卷第五

張耒 文潛

宛丘先生文集卷第六

古詩

送子野大夫罷兗倅歸汶上

愛君記覽老不衰日：早起先鳴雞白頭未蒙國士
知佐郡秩滿寂寞歸我辭魑魅得一麾逢君話舊相
嗟咨幾年東壁無光輝不知武庫實在茲上書薦君
非我職臨分一醉當無辭

送翟公巽赴中書舍人

韓筋柳骨世不聞翟公筆力回千鈞十年聲名滿四

海淮陽邂逅雙朱輪老翁空踈亦何有察公于我意
甚親高談疊：雲漢上一掃闡茸如灰塵夜光明月
不計數坐使衰癯生精神恨無金玉相報答還家三
歎嗟我負青燈論文夜未分曉聞門外送使君問君
舍此去安往紫皇詔歸侍玉宸鋒鏃發劓斷犀象好
為明主裁絲綸論思獻納乃其職况公之意常在民
追還三代舊風采主以事實致此文聖君賢相有美
意筆端與物為陽春

汴上觀迎送有感

居人怜客千里來掃堂為客致酒杯夜闌再拜客辭

去尊前美人不成舞陽關八疊倒玉船消魂此地自
年：船頭旂竿船尾柁南游江海北長安長亭出城
十餘里柳邊人家飯游子少年此地幾經過白頭相
逢可奈何

送胡考甫

胡公精悍姿勇氣如秋鷹兵書百萬言揮麈談如傾
羞戴文吏冠慨然喜功名願得丈二戈為國作長城
朝廷士力盛戰馬如雲騰貔貅肉食武庫森神兵
此豈不足用麾之若雷霆如何彼黠虜坐敢邀金繒
由来在得將選擇當至精譬如養騏驥有御乃能行

安得偉丈夫長驅兩隅清淮南聽公語乃是衛霍朋
終軍白面兒尚欲請長纓縱橫老将手出袖盃一呈
策馬勿自滯我將觀厥成一奮庸將驕汎灌出精英
立功報天子執節擁旗旌男兒當封侯寧為老書生
送邵郎中守同州
君不見漢家左輔百萬户里胥夜驚厭桴鼓爾來荆
棘露霑衣只有山河閱今古邵侯風流華省郎三十
憑熊兩開府不須閉閣決田訟多屑石餅羞魚俎州同
石餼餅中州作東南文章舊人物莫媿尊羹便酪乳
贈藿甚貴之仍煩細閱白沙龍驪驪一骨今何所

送梅子明通判餘杭

東南山水窟錢塘吳越都吾人神仙後厭直承明廬
一舸去莫挽落帆風月湖躑躅青衿子能誦先生書
借問太守誰子雲蜀名儒家有王陽金清商奏簫芋
相逢不妨飲坐嘯治有餘遙知子還日未厭浙江魚

送劉季孫守隰州

君家將軍本逢掖叱咤西摧賀蘭石一時成敗何足
論要使英名飛竹帛到君奇骨尚虎頭白須千騎守
邊州挿架萬籤供記覽探囊五字控風流大河之東
士精勇日飲不妨飛獵鞚五更吹角建牙旗萬馬合

引列正文集
圍行酒甕朝裘風勁黑貂暖夜帳雪滿青氊重樂哉
開口莫言兵雖有頗牧誰能用

送黃師是梓州提刑

嘉陵江邊樹他日繫我駒當時挾書兒抱子鬢白須
傷懷洒孤淚一夢百崎嶇西城送我處今日攬君袂
君才如涌泉隨用隨有餘中年頗流落四駕使者車
持節豈不貴列城隨慘舒君看冒軒冕奴隸笑金朱
猿鳥日異音山川開畫圖懷君即飲酒念我當寄書

送劉季孫赴浙東

將軍好書如卻毅文史隨舡三萬軸吟詩坐嘯士賈

勇不學虎頭飛食肉念昔先君得佳句歸見兒童吃
珠玉垂離存沒偶不死十年遇公拜還哭堂：山西
忠勇後凜：典刑在眉目搃我南下聊復尔健虜點
羗要頗牧戈舡水犀士扼虎三江太湖浪翻屋丈夫
為將亦不惡寂寞揚雄老天祿

送張天覺使河東席上分題得將字

張戾蜀都秀玉立身堂：手持明光節六月登太行
三晉雄中夏朔方臨大荒傳聞賢使者父老相扶將
控弦百萬戶十年廢耕桑但使把鋤犁自然息柝楊
主人延閣老別酒泛蘭觴寄聲梁諫議欲試紫參方

梁欲寄上黨
參久未至也

送呂安禮

呂子有奇氣少年事詩書不肯衣縫掖而隨市井儒
白紵霜雪袍朱纓貫金爰大醉必走馬長呼挽雕弧
興罷有餘歡清歌倚簫竽春風動在思夜席擁妖姝
羣兒傍笑之謂子脫檢拘而我獨知子壯茲真丈夫
屑：五斗米其重無錙銖何為愛瑣屑妄自苦其軀
子亦愛我拙相逢每躊躇論詩夜齋靜秀句出璫璵
遠官無與權見君心獨娛如何忽告別決去如驚鳧
矯：黃鵠姿枳棘非所居清明擇士日子豈久泥塗

送別動苦懷乖離感羈孤搔首歲暮天詩成悲有餘

送程德孺赴江西

程侯治楚我獨知去時民作嬰兒啼歸來明光見天
子還把一節大江西年來屢下寬大詔赤子未免寒
與飢恩如憂病政如藥知病無藥何由治朝廷法度
寄吏手付授得所乃合宜事如白黑初易睹敗以容
悅相蒙欺此行委寄意不淺列城數十受指麾任官
輕外最獎法省閣無補真何為遙知敏手多暇日不
廢樽俎環蛾眉從君多乞歛州紙歲宴天祿供吟詩

送杜君章守齊州

平生杜公賢弟兄北州人物家法稱兒童服膺今見
面溫潤圭璧清霜冰骨中詩書不見試鬢髮欲白論
刑用違所長衆不可公獨談笑氣甚平人才之難
萬英一：士甚重九鼎輕典籤不廢吟擁鼻所難虛
席何人登臨蓄千騎亦不惡聊以餘力蘓疲氓霜清
水落魚撥刺萬甕沸響新醪傾東秦山河太守貴長
安歌無新曲成正須晝夜快作樂舍人但公歸治行

呂尉醉中索詩為別

吾友呂子者其人藝且文何戾綠沉鎗顏臯弓六鈞
勿謂豪少年詩書精討論文詞踵騷雅豈但驚庸人

羣兒事膏沐眩粥倚市門汲：恐不售惟憂貨非珍
子獨抱奇璞九釵包衣巾塵埃自蒙垢但畏人知聞
區：事邊幅碌：隨俗塵顧我未免此深慙非子倫
離別可奈何高歌倒清尊願子崇輝光去：翔青雲

送孫志康赴高陽

三觴草：豈足飲聊具數刻留君歡年來故友半零
落每念及此傷肺肝淮陽窮栖幸見子骨中鬱結為
少寬奈何舍我去不顧薄官謀食何艱難陳郊窮秋
苦雨霽積雨未受短日乾念君匹馬走坡坂蒙犯霜
雪勒征鞍吾曹坎壈皆自取之燕何得南其轅雖然

男子豈常爾且復養此凌雲翰

送陳器之

投身落窮谷黔然類囚拘清忘侶木石機謝友禽魚
築：陳夫子文章德行俱雖云相知晚既合乃不渝
我官洛水濱君寄鹿山隅孰謂百里遙滿案堆君書
詩壇兩不懾月夕鬪戈戈我贈白玉璧子還明月珠
今春子遇我為我駐驪駒高懷坐披豁一飲倒雙壺
聯騎失洛橋據鞍遽歌呼劇談燼餘燭痛飲銷炎爐
首夏餘春妍子還自西都連朝守杯杓為藥正芬粵
插花烏帽傾醉倒傍人扶已別尚及願將歸重躊躇

官期子當滿念別久鬱紆况乃西郊道匆：過行車
一酌不暇勸矧欲盡子娛亦知微誠薄所惜違區：
親友義不小况乃知心歟忽：流水濱尚將執子祛
願子保多福六駟縱南圖永此金石交曠：堅終初

別外甥楊克一

疑脫一葉題有誤

彈琴不須絃意在宮徵外濁醪分美惡於道猶帶芥
平生分別盡獨此有涇渭坐令劉石徒笑我猶嗜味
石常以秋風三十里碧粼兼紫鱗叅軍呼可應肯使
油為酒空樽對

送呂際秀才南歸

咽：幽谷泉蕭：秋竹風豈不愛孤潔但傷愁且窮
 呂子南國秀滄溟貯其骨出試輒不偶低頭避兒童
 離家五千里客飯苦不豐冷落卧寒齋苦吟如秋虫
 昨者投我詩九數閱未終欲知作者心但視讀者容
 文章出貧賤此事今古同但願子富貴不願文日工
 今日告我別出門若驚鴻各在天一方何當復相逢

送晁將之咸平簿

逢君執經博士堂見君賜第出明光
 倦眉作吏百態惡豫章
 天要雪霜連牆秋雨老
 藜莧十日不見已束裝
 試尋崔丞謝客處壁間有詩細作行
 咸平丞

惜別二首贈子中昆仲

寒雲崩騰不成雪北風吹窓燈半滅
 病來廢飲卧無眠一夜吟詩聲不絕
 南城三俊坐契濶想對寒爐掉吟舌
 留行一日誰有情慰我與君千里別
 道長塵土疲馬愁歲晚風霜獎裘裂
 人生何用讀書史文字未補囊中闕
 驅馳所幸一飽耳仕而謀食愧前哲
 可能天獨嗇吾曹自應所學為之孽
 雖然此事余不悔昔學固知今日拙
 欲持琬琰易羊皮玩之已久安能輟
 萬端畢竟有天命計較何須論瑣屑
 勞歌無和坐達明曉鼓鼙：墮殘月

我年十八從先生今也相逢得三子坐思前事且十年嗟我不老將何俟子中兄弟氣清拔紫若瑤環與瓊珥逸民駿馬不受羈陵躒奔馳動千里先生聲名二十載乃得姻婭皆文士我今賀子得所遭非我先生誰辦此定交自恨相知晚漫浪一官非我志論文終日坐忘歸欲別出門還頓轡我如轅駒幸芻豢豈不厭勞安敢避人生謀食亦可悲世上捨閑皆失計西來有人話吾邑頗說山川慰人意寄詩莫憚憑驛傳對酒惜哉無子醉到官便掃琴書室有客過我行當至子敏已許來壽安踈泉養笋待子吟更東山芻到官便治所居室

秣君驥

聞壽安官舍多修竹流水

送歐陽經赴蒲圻

異時嘗飲洋川酒幾喚扁舟度樊口西山泉石多故人送子南行一回首蒲圻小縣聊讀書當使里閭無呻吁結束歸來接臺省不應厭食武昌魚

送畢公叔奉詔赴陝西

畢子談鋒不可摧捷若急電飛霆雷老儒宿學不敢較左右戈戟縱橫排文如翻河注浩渺學有要會窮根亥眼看青雲不着脚决去得邑窮山隈漢家封疆際四海琛賁萬里聯翩來西河故地獨何事禮樂舊

俗遭狼豺包藏隱忍非一日獸子未可寧心懷英雄
天子命世主撫劍震怒風雷迴馬如屯雲士如虎萬
車載甲如崔嵬豈惟俘斬復境土誓剖巢穴窮雛胎
除書命子叅漕府國有大事須羣才男兒功業在勤
苦莫惜沙塞衝塵埃禦戎舊策子所悉曾臆請為將
軍開封侯報國在今日贈行滿舉黃金

王子開朝散早年以疾病謝事還江陰求詩
為別三首

濟物昔所務舍耕還自非駁：老將至忽：意多違
門有王夫子柴車謝事歸令人三歎息羞澁向塵衣

又

田園何日到水國先秋寒興來出飲酒興罷歸杜門
漫即游已倦老眼亂丹鉛扁舟肯載我共看雲濤翻

又

避祿免危疾棄鉉得黃金須眉藹如漆便覺老難侵
江湖足幽遁市卒或可尋莫思芙蓉子丹田亂君心

宛丘先生文集卷第六

宛丘先生文集卷第六

五陵三輔盡市平
大河長莫思
笑翁七十日
歸民以
運轉出政
務無黃金
斷最儲
收泰則
莫多
驟到

七

宛丘先生文集卷第七
寄陳器之
宛丘先生文集卷第七
寄陳器之
宛丘先生文集卷第七
寄陳器之

宛丘先生文集卷第七

張耒 文潛

古詩

寄陳器之

昨者見君才頃刻
滿馬塵埃面顰黑
自言別家春欲
闌歸意如飛留不得
玉鞭揮折手成脰
一日到家馳
兩驛今朝得書一
何喜酌酒烹雞稅
征輒自言山城
無與樂坐看飛花
良可惜手携婦子
口吟詩文字揮
毫便千百醉歌昌
谷和我吟錦囊舊
句無顏色
伶君
潦倒誰復省
場屋十年名烜赫
嗟我春來亦何事
飽

食高眠度朝夕簾前相對但有山坐上清談更無客
逼眼花光羅綺眩照人酒色瓊瑤白風光似此寧可
忍酩酊高歌卧花側平生結友事遨遊未省連年守
山僻彊歡獨飲豈所樂捨此無謀慰愁寂思君一笑
何可得王事有程身有役堂南柳條爭着葉繁李天
桃落如積請看春物能有幾坐見清和變炎赫須期
載酒對東風及此殘花尚堪摘

寄集節二首

陳侯氣飄：誰敢易挹酌俊如搏風鷹清如啖霜鶴
高懷畧俗事見者初駭愕須臾發其有珠玉隨洒落

浩然謝畦畛誰不愛而樂論交嗟我晚玉手未暖握
別來星一周庭竹再飄揮洛陽誰知子恐未免寂寞
崢嶸胷中氣誰與發其鑰知心古所少獻厚報或薄
興懷每念此中夜情抱惡雖然千金璧豈得常在璞
山城一尊酒子去誰酬粟高歌遣我思長嘯觀寥廓

又

北風號空庭山雪鳴急霰是時我與子傾蓋初相見
相逢兩恨晚語罷喜復歎明燈照紅爐杯酌方爛漫
劉公摩霜鬚氣若初捷戰喜我兩人交深杯手持勸
縱橫恣談笑一醉便侵旦想子病酒容蓬頭不改飯

那知會日少告別不容戀出門送子歸慘若失侶鴈
終朝或不語妻子怪相問別來三得書日月去如箭
栗亭在何處山川浩千萬吾將理南棹遂我江湖願
兩如隨風雲那復計聚散遲君秣驪駒別我過窮縣

寄余五十五

憶昨戊午寄東都人事紛々相見踈補官洛陽我西
走兄理舟楫歸江湖往來相識頃刻爾坐使一別三
年餘鄉他滿眼非故舊南北耿々無音書福昌古邦
廢已久莽々榛棘藏廢黜空宮蕭條唐舊路古堞斷
續韓遺墟商頑餘民俗未泯習尚完曠羞為儒高堂

塵埃坐無客雖復彊接非懽愉嗟兄尚復記憶我兩
得書札何勤渠最後新詩意不淺知子過我山陽居
人間翩々輕薄子交友暫尔久則渝懽忻憂患心不
易我視一世無君如念昔登科各年少子中第一名
傳呼春風朝游踏廣陌夜雨縱飲傾金壺當時意氣
今在否十年我困官庭趨君宜騰踏上寥廓何乃失
足遭崎嶇人生難必但如此付委造物隨所驅得之
幾何失未損七尺可貴唯吾軀洛川春風來已久桃
李次第爭芬敷登臨想子不可見夢逐流水游東吳
東吳舊游我所樂飲有美酒烹有魚何當相逢兩披

豁擺落萬累無嗟吁

晚歸寄無咎

雨氣入古屋薄惟生夜清想君擁鼻坐端學苦吟生

泥深欺我馬歸卧日半楹浩然有奇想非子定誰評

寄道公

東屋雲移山屋西日半壁餘天一劍清遠雨萬絲白

官事癡可了未遭官長責惟應晁夫子不可別頃刻

寄道公

知公鼻祖冬之日謫向江山冷無匹粹然真氣滿輕

軀自言位次神仙秩同輩幾人姑射老惟公躩居

第一鸞腰不舞自欲飛神履瞥波元不濕永巷春深

簾幕幽西鄰有人名莫愁我老推頽垂舊約空能時

作夢中游

昔我初見子三時客京師聞名久不獲既得過所知

示我一卷書大小百首詩我嗜不可輟熊蹯荐朝飢

約子彭城游念當行有期中間忽倉卒決去不予辭

子後來高郵我居淮之湄中間無百里詩句屢交馳

客來得子書云子久南歸投書不能讀恨我聞之遲

使我早知此扁舟尚能追遠別不執手近居不相携

寄答參寥五首

長安文集

卷七

四

每念：恨者歎：中腸悲子行日已南我去日已西
音書不可頻何以慰我思
蘓公守吳興山水方有主子兮從之游掛錫當可駐
塵埃困孤鶴念子久失所秋風展其翼道使萬里去
青雲引高唳爽絕誰敢伍余駒欲西秣東我江海槽
平生二三子徃：在南土子才得所樂我拙日益魯
拳：相思心契濶不得語

秦子我所愛詞若秋風清蕭：吹毛髮蕭：爽我情
精工造奧妙寶鐵鏤瑤瓊我雖見之晚披豁盡平生
又聞從蘓公復與子同行更鼎而迭唱鐘磬日撞鳴

東吳富山水草木餘春榮悲余獨契濶不得陪酬賡

又

我生為文章與衆常不偶其所為詩不笑即嘲詬
少年勇自辯盛氣爭可否年來知所避不敢出諸口
時：未免作包以十襲厚低心讓兒曹默：衆人後
見君不能已頗亦陳所有君豈少取之時以佳句授
幽絃喜有聽清唱慰孤奏如何瞥然去使我不得友

又

蕭：江湖客踈瘦若秋竹苦心為詩章日夜撓心腹
清絃無浮聲促柱有哀曲湔：幽岩泉一：清可掬

人生於文章初苦力不足及其成欲售又困瞽者目
子從吳興公乃獨獲所欲得意有知賞幽懷免窮獨
嗟余失所投痛學自藏覆子當慰我窮時寄書數幅

初到都下供職寄黃九

千里不相見勞：復何辭不應一城中耿：令我思
儼舍酒家樓椎壚卷其旗鼠壤敗晨炊守翁噪羣兒
馬傍挾兩羸雙踵待刻移五日長安塵故山夢中歸
何以洗我心望君青松姿懷情久不吐古屋絃悲詩

寄楊應之

應之蹉跎三十九猶著青衫困塵垢高才逸氣老益

奇我每事之安敢友逢時則駕子何患有才未用誰
之醜暴得從來失常速徐驅未用鞭其後掃除萬事
付諸命收拾至樂歸之酒聞公頗以飲自名我亦抗
衡能至斗京師常恨酒不足貧旅僅得糊其口乃知
一飲尚間闕功垂萬古知難偶百年痛飲乃良圖安
用金朱裹枯朽我生自斷計已決君亦我徒能尔否
揚眉鼠子事輕肥貶眼小兒夸謹厚須防仰嚇忌鶴
雛更慮致魘逢芻狗獨醒不若舖其糟羣犬猶須避
而走遭刑每笑稽叔夜得計須師彭澤叟我官古邑
洛之陽聞有山川亦清秀行當釀秫從子游更以新

詩相獻侑

寄李端叔

束髮聞至道榮辱久齊觀中年嬰世故已復傲憂患
 閑居雖荒寂几杖頗清晏悠々閑晷景草々貧寢飯
 狂言無為發濁酒醉自勸夫君通家舊邇者頗屢見
 相望豈云遠教舍隔異縣吾人師佛祖妙旨得忍粲
 歛藏避世俗未免逢侮訕坐令鬢垂雪猶把從事版
 尺書每見警妙語珠在貫復君進明德同遂丘垤願
 陳墟自古皇疆野實楚縣沃野接神畿荒溝漕淮甸
 民風靜而陋原隰平以遠我來逢艱歲禾黍秋色淺

荒居咽蛩蚓風雨老藜莧閉門謝車馬隱几親筆硯
 馬迹巷泥深庖烟簷日晏深居窺老易妙理殊自玩
 困亨方才足夸安勞遠願垂離感歲月老色各滿面
 友道古所敦尺書莫辭倦

寄劉伯聲 在海州作

別君幾何時人事浩千萬身如張射侯憂患劇疆箭
 崎嶇走窮縣艱苦君所見未知水菽豐已感霜露變
 羈孤寄窮海親友誰吊唁析圖補冬裘乞米煮朝飯
 無聊猶自惡援溺固誰願人生不終否此語非我分
 英雄伏泥塗暫晦久必現如予百不能理自合貧賤

豈當議隱顯而有不遇歎但思竄山林遠脫人世患
有田足耕耘有水足罩汕蕭然便終老到死百不問
平生泥佛祖久已師壁觀况將無生禪下視有為幻
吾子出羣材千牛有餘刃行當脫塵埃鳴珮侍清燕
高卑各有得願勿譏尺鷃不有行道入誰當佐堯舜
時哉勿自滯功業在力勸握手不可期此計吾行辦

寄參寥

春風入楚鄉幽子別經歲有客過我門携君尺書至
昔我出京師倉皇省家事遂令千里別不一執君袂
又聞子亦行杖履若飄駛雖成相思詩欲寫不可寄

飄：山水夢時與飛錫值乃能以書來知子猶我記
浮雲隨高風聚散未可計遲君冰雪詩濯我塵埃思

馬巨濟董後魏王墳作詩寄之

城北牛脾山千丘壓其麓事皆有司辦聖世教厚族
園林迫復土百役興甚速煩我別駕公侵星次空谷
郵亭舊客去二刷錢官皆去閑日睡頗足聞鶯有佳興徒倚
近喬木櫻笋味鼎來管絃調漸熟期歸酌燒酒及此
未炎燠

宛丘先生文集卷第七

五言古詩 卷第七
... 宛丘先生文集卷第七

宛丘先生文集卷第八

張耒言文潛

古詩

官閑

官閑吏歸早歲晏寒欲盛槐稀庭日多
鳥下人語靜
幽花破寒色過鴈驚秋聰酒賤莫厭沽
北風行欲勁

曉赴秘書省有感

桃李欲開時長安春正好晴空倚闔闔
朝日散馳道
云收龍蛇榜爛：金碧曉清都不容塵虎
士守洒掃
家無當閑警衿袂免顛倒何慙驅款段
吾事不須早

儒生近卜祝本自異時好聖朝尚文雅詔使窺鴻寶
平生一盃酒江海送吾老靜喧非人事不得守懷抱
跳梁干造物乃取鎔錡誚委懷隨所遭千乘才一笑

書館直舍

紫禁斷人聲蓬山轉春日樓外晚鼓傳城陰衛番出
循除擷新秀紅紫間踈密倚天黃金闕龍虎氣鬱律
明時職鈇槩寓直守編秩踈閑謝禪補歲月感飄忽
謝公山林賞不為軒冕屈體道無朝野達情慙利物
病臂比已平獨挽弓無力客言為史官何事
挽弓戲作此詩

君不見吾鄉少年曹子栢文章七子相後先有時擲
筆事弋獵邀輕截俊馳平原獵猶名弓燕代馬射雉
歸來燕清夜一聞驚倒荀令君何物書生乃知射我
雖把筆笑筆腐儒束腰待懸玉鹿盧自從病臂憂親友
百嗜為之心一枯降癘無名天悔禍奪之而與復完
軀但慙未使杯安肘猶負當年門掛弧便使淒涼身
未伏畧聞弓馬氣猶粗莫為早衰須袖手將軍臂折
尚平吳

謫官

謫官成吏隱古寺度高秋寒燈明夜室清坐聞更籌

裘葛屢往還感彼歲月道吾意方有會誰能賦離憂
淮陰大寧山主崇岳逮與余諸父遊今年七
十餘耳目聰明筋力強壯奉戒精苦禪誦不
輟聞余自黃歸欣然空所居而相延日與之
語或寂然相對終日使人之意也消因賦此
詩

我來之初季春月門外李花如積雪杜門燕坐度長
夏庭樹秋風忽騷屑西馳老大不復燎急雨淒風爭
應節紫貂暴日知有待畫扇倚墻將怨別蒸雲積潦
漸收拾惡木煩蕪稍摧折不知此事誰主張躍馬奔

車忽回轍嗟予行世蹈坎壈僅免豺狼膏齒舌三年
閉戶餓江島脫粟無餘衣百結近者皇天忽悔禍雨
施雲行咸凜雪復官還職遍海內爭脫囚冠鳴珮玦
老夫龍鍾衆人後一舸循江信公涉風波歷盡見故
郡親友相逢驚白髮道人已老見我喜淨掃高堂容
憇歇佛龕日近得香火僧飯時容供粗糲讀書小技
謾勤苦安禪大觀無分別久便閑放輕祿利已脫憂
危傲縲紲天時進退古不忒人事興衰今屢閱酒濃
村店足斟酌魚美長淮恣舖啜從今萬事付天工致
主安民看夔契

引分全文集
入蒙恩守東魯不意流落之餘聖朝昇之藩鎮
感而成詩復用李文舉舊韻
我師四十心不動寵辱悠々付春夢聖朝湔洗諸老
成顧我衰晚名亦共魯人詩書久寂寞壁間不歸書
府送道衰洙泗忽千載後來為政誰輕重平時擇守
要有補豈但坐使斯民供吾邦邑子有將夏未肯無
言受愚弄天王有意蘊疲俗何術與紆鞭董痛應須
問道東家翁必也斯民使無訟

宣城至日謁天慶觀行香呈郡寮

溪山慘殘歲况乃值新冬清晨率其屬肆禮凝琳宮

漠々冒原露凄々隔水風南方異氣候霜葉未全紅
忽憶簪史筆早趨闕蒼龍拜舞東上閣佳氣鬱葱
談笑出右掖交游盡英雄老大心已矣依然夢魂中

感懷

枯樹桓司馬五柳陶徵君微木不足道所欽此兩人
一埋柴桑骨一為九錫臣榮辱俱已矣芳穢萬世間

感遇二十五首

幽居念世務頗復窺造物通為一憤々愚智更出沒
漏天呀不補淫雨方蕩瀟豈獨無良苗稂莠亦飄忽
惟餘尊中物三酌便兀々此事頗有憑時從散幽鬱

致竹伐梧桐意欲困鳳凰彼雖無食息逸氣自高翔
鳳何求于人：自欲鳴尚麾之亦安有庾子鶚在堂
昂：青雲士忍飢而擇糧使果腹是求何憂無五漿
又
士生有輕重初匪他人為視身真千鈞所壓無不摧
羣偷攘獎漢喘走恐後時隆中賢少年長嘯弄鉏犁
白頭左將軍歛衽喜得時狼石挈紫髯老瞞受鞭笞
艱難永安詔委國忘其兒心知龍鸞人不顧鴟鷂資
使無三顧重一飽起相疑

世無英霸器俚叟誦詩書不能靜丘民安用稱唐虞

堂：贊皇公龍變誰可拘邂逅逢可人奮身為謀謨

草書救深州元翼終就屠誰能叱印吏姦將立改圖

裴度書遺王庭湊不能出牛元翼李德裕語范陽印吏張仲武不敢納亡命才謀相去可知世必謂裴勝

李過天方棄大和拔公去其都十年奇才論獨智羞

羣愚文宗將圖閣寺先出德裕德裕有奇才論訓注之敗

秋房燈火靜客睡亦復安弭彊力汲：涉廣心漫：

白露下百草心知歲將闌彼微者啼鳩職使仇蕙蘭

吾非蒿目人初不與世患淫雨作橫流執蠡挹之乾

我師青牛書不爭忌處先既自守吾寶在辱亦何歎

又
羣動同大塊冥：含至精乾坤職覆載日月互昏明
蚊蟲共一器擾：一時爭推移付大化終古一空名

又
大冬積巖殺布令兆微霜淒：中園木華采燧摧藏
豈無孤芳者佳菊獨煌：後彫雖爾德曷補蕙蘭傷

又
炎劉運欲圯蠹孽依根生姦臣助斷喪主意不得行
云誰知巢穴請劍有朱卿傷哉滔天禍成此直士名

又
皇唐欲喪亂豺虎依山丘君王信李訓玉殿行戈矛
繫狗不係首遭噬血橫流堂：贊皇公委棄不與謀

又
腹心主包藏爪齒自自衛折衝須豪英靖國用君子
遐哉三五朝此道無不備晏嬰才媿管齊景不霸世
商子德漸奚秦彊仍早圯

又
風霜凜已高歲月逝云邁蕭條陋巷士藜藿守耿介
欲吐胷中語旁人笑言大漆室非近憂宜遭鄰里怪

又
登高望海縣秋日麗玉京喧闐車馬音風震入青冥

大明屬昌運戴白不知兵華衣美酒食婦織子孫耕
生無係虜憂乃覺患禍輕請看五季世戰地猶榛荆
西京全盛日宮闕上参天建章千萬戶白晝下神仙
金瓊麗雲日拱楠壓山川一朝喪亂至西觀入戈鋌
漸臺既已平長門隨飛烟物大變亦巨安榮竟徂遷
毋怪秦漢君甘心惑神仙
穰侯拉闕中頗畏諸侯客搜車計已遲終困范公策
庸夫吝富貴百計私自惜勢移禍敗至智巧竟何益
至公覽英俊宜補乃無隙請看桑林餓亦脫趙子厄

鬻隙不在大巫臣圖夏姬百端終困楚吳子會黃池
怨有大于此居高易逢危何言戒困獸無易箠中尸

林居屏百患覃思觀幽遐炎黃已蕪沒末路多疵瑕
私智互馳騁短長迭矜夸更相為禍福勝負時紛拏
超然赤松子高笑在雲霞
周王仗黃鉞自謂將天威孤竹西君子采薇旁笑之
豈徒驚世俗趨死乃如歸周衰楚蒙吏快辨多文詞
高言毀二子至與盜跖齊夷齊固齊聖於道豈無知

輕身立世教爭奪尚如斯
江湖有潛鱗頗厭沮澤陋竭來游滄溟矯首觀宇宙
是時三神山忽隕巨鼇首弄波走仙聖龍蜃紛格鬪
重淵滂日月萬類錯昏晝掉尾歸去來蓮巢以為友
衆聖演世教金仙獨圓成徒緣異形範乃復遭譏評
幽居覽物化且復究吾形捐書守寂寞萬化歸無生
治疾餌靈藥爽然疾有瘳因茲涉方書仙聖或可求
豈疾乃可治而生不可留吾將飛五金息駕于蓬丘

又

懷王棄屈子憔悴楚江湄終然葬魚腹終古耀文詞
千年洛陽客作賦不無譏謂當棄之去覽德乃下之
君臣本大倫當以恩義持如皆輕合散是與塗人夷
靈均豈願沉深意實在茲傳懷終泣死何亦拳之為
微陰兆九地萬木方滋榮微霜初可履回首陽慶冰
秦王按劍日豐沛赤精生光輝能幾時日中月已升
達人知其然居世忘驕矜彼哉夸毗子志氣易滿盈

又

處世三不遇放歌歸去來林卧觀太初悠々付一杯
扶搖震雲海三山安在哉金丹或可學他日出塵埃
蒼鷹初化鳩未忍忘擊搏照水或見形乃見悔其昨
麗戎有奇女遭虜常涕洟改服登晉宮更恨來苦遲
變化驅念慮丈夫或有之賤貧矜懷寶富貴乃無奇
又
縲絲非緣魚有絲生網心弦木以為弧鳥獸不安林
大鈞本無事物類亦暗々誰令一機駭萬變起相尋
焚木豈人火棄沙非外金如何巧詐子尚欲峻而深

晚春獨酌有感二首

春晏岩谷秀喬木環我居引此西澗泉澗々漱我除
危橋跨方池脩竹萬有餘人間午陰靜鳥下驚游魚
清風掃我室堂吏案無文書手携金僊經諷誦自卷舒
身閑去道近地僻與世疎何須緩巧類搖曳王門裾
又
誰謂我無友蕭然山谷間修竹乃佳客清風如妙言
擷彼林間笋致酒方池邊惟時春服成花葉猶班々
月出我已醉扶歸不知眠洒然中夜醒起聽西澗泉
世累乍去念放歌心浩然功名付長嘯持用樂目前

引... 一日復一日復一日... 且看尋撞枝休懷失馬憂天公有至信萬古一春秋
天運不暫止何啻過駒隙向來簷間日忽已墻東隅
樂者苦其疾憂者怨其舒由來盛與衰變滅皆須臾
十夫操戈羣入市人人犇走爭逃死雞飛犬逝閭里
空攘奪金珠虜妻子世人惡盜恐不深真不為盜能
有幾何況虫：田野人欲使飢寒不為此

有所歎五首

飢兒無食偷鄰桑主人殺兒屍道傍母兄知兒死不
直行哭吞聲空歎息生重於桑亦易明何為以身邀
所輕沒身毫釐易其死世上誰非竊桑子
蛙鳴聒：滿我池我寧知爾樂與悲周公洒灰教後
世願我齷齪不忍施越人嗜汝過芻豢毛以芬香侑
朝飯藏身泥沙勿妄出世人重味輕天物
蝸能毒人不能死人能捕蝸殘其類世人意惡蝸為
虐人蝸相殘竟誰至不忝彼已怨一方自古詩人以
為刺我疑人酷蝸所羞何暇區：論蝸罪
衛青功高不荐賢猶有蘓建能拳：魏其已誅武安

死將軍畏禍無敢言田實安知天下士可是一言誰
得罪當憂磊落世上奇白頭騎奴安得知

林居

林居觀變化寒暑無時停日月迭奔走、作昏明
彼人於其間起妄自經營寧知運之去不受如力爭
終古一逝川聖達亦歎驚寄言夸昆子豪奪竟何成
糶官粟有感
持錢糶官粟日夕擁公門官價雖不高官倉常苦貧
兼并閉困廩一粒不官分伺待官粟空騰價邀吾民
坐視既不可禁之益紛紜擾、田畝中果腹才幾人

我欲究其原宏濶未易陳哀哉天地間生民常苦辛

有感三首

郁城本自貳師謀騎士拔劍猶封侯董生明經守正
直白首區、相戾國參差世事足嗟嘆 平我笑羣兒
較目前可能董子之榮辱乃在封侯得失間
羣兒鞭笞學官府翁憐兒癡傍笑侮翁出坐曹鞭復
呵賢于羣兒能幾何兒曹相鞭以為戲翁怒鞭人血
流地等為戲劇誰後先我笑謂翁兒更賢

南風霏、麥花落豆田漠、初垂角山邊夜半一犁
雨田父高歌待收穫雨多蕭、蚕簇寒蚕婦低眉憂

爾單人生多求復多怨天工供爾良獨難

有所歎

達士不可羈其次遠羈絆我無達人風又不能自遠
紛：隨世俗碌：走薄宦其來或遭驅其去或被挽
吾求亦何有五斗固易辦不師陶淵明腰為小兒俛
由來為貧仕榮辱何敢辯乘田與委吏孔子不云賤

寓陳雜詩十首

傳舍不可久東裝投新居新居亦苟完佳木頗扶疎
洒掃尋丈地琴書遣朝晡風雲中夜變大雨如決渠
落點若強箭穿我老屋塗中夜起明燭移林護吾雛

傳聞北城隅老弱堤上廬官吏操畚鍤紛：役千夫
螳漏或一決城圍變江湖吾衰也久矣豈復憚為魚

又

昔記古甲子商滅而周興如何雨此日乃為靈雨微
陰陽久乖張此事頗有憑豈天悔牧野洗此漂杵腥
舊雨水未乾洞房苔欲青新雨雖霖：欺我牆善崩
虛堂就夕眠永夜楸桐聲蕭然秋氣至坐覺巾履輕
憐我老病日三伏困薰蒸得涼且飽飯何暇念秋成

又

朝雨如霧絲咫尺不相辨俄然晨光漏紺碧出天面

天工易明晦頃刻俄屢變今朝事大定雲物卷組練
客有北來說蝮生被數縣穀穗無一粒遺稗如立箭
卑田成大澤投種哀莫見官人惜不知猶喜輸租辦
興懷及解寡猶愧吾飽飯

唐有元相國實救顏平原平原腹有丹尺解神已仙
顏公死已矣人見如生前致令遺其象委曲與人言
相國死倉卒穢鞵塞其咽家門隨手破但怪椒斛干
顏公黃塵外風節猶凜然元子墮九幽遺臭萬世傳

又
清夜何晏々客眠亦復佳鄰鐘喚我覺咽々聞城笳

披衣行中庭星漢已橫斜缺月掛西南皎々流清華
莎雞振其羽蟋蟀旁悲嗟悠哉歲已秋日月如奔車

又
開門無客來永日不冠履客至我老懶投刺輒復去
端成兩相忘因得百無慮故人在旁郡書信不能屢
興哀東坡公將拚却山墓不能往一慟名義真有負
可能金玉骨亦逐黃壤腐但恐已神仙裂石終飛去

又
疲馬斃枯草閉門苔蘚深閑坊居人少秋日踈槐陰
境寂心亦閒蕭然散巾襟靜中有深趣因見至人心

引... 谷神古不死茲理良可尋無令兒輩覺一撫無絃琴
念昔為吏日朝夕羨人間解印出公府俯然若歸山
衡茅三畝居無客門常閉早眠而起晏永日或不冠
故人遠寄酒為致一醉歡我亦領其意呼兒具杯盤
長閑貧亦好安用朱其轄我生本蓬華久已傲飢寒
我不知暑退但覺衣汗乾頗怪庭中天湛然清以寬
有物叫草根啾、自相喧問知已新秋大火流金丸
天工變寒暑正爾事亦繁靜觀付一笑吾事寧相閑

但無筋力健悠然佳意還喧、憎隣里砧杵亂人眠

又

秦子死南海旅骨還故墟辛勤一生事空得數編書
琅、巧言語玉佩聯瓊琚知者能幾人憎者頗有餘
書生事業薄生世苦勤劬持以待後世何足潤槁枯
興懷及平昔使我涕連如道路阻且長悲哉違撫孤

雜詠三首

隆中卧龍公平昔事耕釣無言顧同儕高視獨長嘯
彼寧惜開口顧爾非同調何事逢玄德曹孫一言料

又

六槐當我庭春葉密如暝朝來南風起已見萎葉落
盛衰同時來豈必待蕭索鄙哉兒女癡情亦情所樂
鳥鳴高屋上飢顧朝求食擾：市井人日夜衣食迫
豈伊理當然或者養未得我歌南風詩歸坐還歎息
感事二首
投老益無趣誤為世塵櫻飄然欲脫去疲弱安能耕
始謀苦不減妄欲事功名中路兩不可傍徨始嗟驚
回轍愴已晚悠：事逾征萬物各有求我生安得寧

自古衣食動物生無時閑春耕望時雨厚土常苦乾
舉頭呼天工天遠安得聞幸此中夜雨蕭：洒中田
天人兩異情相值良獨難水旱與豐年由來皆偶然
愚夫苦多怨智士即而安我歌寧獨此萬事一嗟歎

雜詩二首

獨居無與往况此陰雨天起來復何有詩書散我前
偃卧一榻上讀書疲復眠經綸負夙志跌宕窮吾年

高堂斷四聽鳴雨曉未止堂空雨聲大滴：清我耳
朝眠引幽夢遇我同心子談笑未容周竟開坐千里

又

無題

歎：鳴葉下初無風過之流年一如此慷慨使心悲
平日談堯舜立朝羞自私溫爐暖老客聊復此棲遲
一春苦多風桃李見無幾良游時已失忽：三月尾
中間亦何有徒自亂心耳所嗟違所娛坐費良日晷
堂北千葉桃微本混榛枳居然未之省一日燦相視
零丁不忍摘攀玩聊自慰乃知物雖微未易即踈棄
從今至零落猶足伴尊哉仍煩芊綿草藉我花前醉

自古亦又

昨日鴉作巢今日鴉哺兒念知三月闌春物行已稀
晚風颯不收殘紅怨餘姿回風起輕寒擁爐火重吹
燈明夜齋靜日澁臨書遲病齒不飲酒持杯勸妻兒
豈無兒女心惆悵桃李蹊彼昏安目前丈夫方有思

又

古今不殊途掩卷獨長想炎爐與死灰相去如反掌
彼昏誠不知一醉富莫量那知道傍殍曾是厭杯盞
一金短販兒豈暇議得喪但憐反覆間觀者為惆悵
聖賢蹈大方不苟目前安寄聲愛憎間得失真一餉

宛丘先生文集卷第八

一全路... 宛丘先生文集卷第八... 宛丘先生文集卷第八... 宛丘先生文集卷第八...

宛丘先生文集卷第九

古詩

登汴岸

張耒 文潛

悠々十月尾野靜田事息嚴霜草木黃千里樹一色呼鷹者誰子窘兔保深棘物皆愛其死吾寧忍鮮食

運河道中

孤舟逆水上野靜聞水聲鷗飛不遠水寒浪濺霜翔夜氣岸蕪木夕光燿照星長吟弄孤槳知有魚龍驚

離楚夜泊高麗館寄楊克一甥四首

去城未五里夜纜繫衰柳水亭暗風雨人散聞吠狗
平生足羈旅况此還往舊有感不自知凄然獨回首

又

水天夕雲重不雨衣自濕夜寒更士語雞唱舟子急
青黃數宿莽蒼茫暗原隍高城亦何有倚墻成獨立

又

客去水閨閉踈燈亦復收川鳴半夜雨臥冷五更秋
扁舟已寒暑冉：真乘桴一燈照客睡短夢良悠：

又

士師我自出爽邁陵清秋年少不飲酒昏燈夜問囚

爾家外大父聽獄代其憂備暘朝煮飯驅蚊夜張幃
獄成上府時稽顙呼張戾先子治獄卹囚最恕心臨
縲紲相盜以戈矛無令市死厲請帝號重幽

離黃州

扁舟發孤城揮手謝送者山回地勢卷天豁江面瀉
中流望赤壁石脚揀水下昏：烟霧嶺歷：漁樵舍
居夷實三載鄰里通假借別之豈無情老淚為一洒
篙工起鳴鼓輕櫓健于馬聊為過江宿寂：樊山夜

將至官坡登一土岡望復州作

茫：夢澤連禾黍斷壠橫岡散平楚登高誠望竟陵

城孤煙落日知何處舊將如夢去莫挽客愁并、還
如故他年若聞鴻軒人堂下薔薇應解語

晚飯寶應

晚風吹古柏落照明空山深行得寶剎崖嶺相回環
人遠草木遂境幽魚鳥閑道人掃華堂延我具晚食
齋庖野菊美石井新泉寒既飽陟上方浮香出林端
平生麋鹿志彊學伏車轅塵懷造勝絕欲去猶三歎

廣化遇雨

浮雲蔽高峯臺殿延晚色風聲轉谷豪雨脚射山白
東樓瞰虛明龍甲排檜柏蕭森異人境坐視動神魄

撞鐘寺門掩晚霽尚殘滴相携下山去塵靜馬無跡
歸來解鞍歇新月如破壁但恐桃花源回舟已青壁

將至都下

竟陵南飛稻新熟夢澤悠、傷遠目春風嶺上望齊
安太昊城邊攬秋菊那知歲暮東州客大山蒼寒晚
霜白雲收霧卷日月明却上天衢瞻玉色弊裘瘦馬
古道長九旬刺史歸空囊歸去故人應笑我滿衫清
淚說潯陽

自南京之陳宿柘城

荒城人稀荆棘老野兔驚跳出寒草蒼、落日黃雲

西驅馬城邊尋古道入門四顧皆桑田民居三五依
道邊暮投佛寺下馬立衝眼滿屋燃萁煙老僧自言
八十餘老矣不能營所居村僮依竈展敗席上有空
梁懸木魚旋汲新泉濯雙手青燈照客黃昏後羣兒
爛漫眠我前新月欲傾光入牖夜敲僧室借酒壺不
惜青錢取次沽酒香入戶推枕起剔燈吹火然銅盃
大杯一沃不留滴滿眼惝然睡來集明朝上馬倒殘
壺不怕新霜敗裘濕

因沙阻風

大江春風浪如屋客舟迎風因沙宿連檣接柂古岸

傍岸頭無人春草綠船頭日出炊烟起買魚携菜來
就市漁人水惡不出門蕭條野市無雞豚堤邊紙錢
灰若雨洗酒賽神巫降語南人艇子不避風橫江五
兩翩：去

離陽翟

驅車發潁川回望失嵩少霜氛塞層空黯澹寒日曉
原田際天平百里見飛鳥纍：道傍丘石獸卧衰草
不知誰氏碑剝裂偶未倒支離見隸字書帶漢筆妙
遺墳不可問文彩竟何効永年恃金石此計久可笑
昔游已三歲存歿傷懷抱飽諳人世憂安得身不老

次賴川

許昌古名都氣象良未替客子遠道來塵埃滿襟袂
黃昏造孤驛買飯嚙枯藪庭寬蟾蜍高霜氣徹寒被
賴携朱堤盃可具一飯費無人勸我酌孤燭伴客醉
笙簫誰家樓語笑月中市何人不行樂而我獨涕淚
夜長更漏稀風急鼓鼙駛天明捲席去行止隨所值

渡伊水

雙崖若爭妍秀色日相射游人夸水東揮榜渡清瀉
潺湲溪邊風五月自瀟洒中流望南北河漢自天下
嗟予水鄉客塵土困蹈藉江湖久懷歸無地稅征駕

臨流動長想照影久悲吒滄州儻有歸功業付高謝

出長夏門 初望龍門

出郭心已清青山忽相對游人傍流水俯仰秀色內
誰張蒼玉屏中斷神斧快清伊瀉其間銀漢曳天派
參差樓觀出杳靄林麓邃巖聲蒼遠響水影弄空翠
同游得君子 同第興與烟霞會選勝雖自茲高懷已
塵外

飯昭果寺

飄然乘興游看酒笑俗具僧居致野飯草：亦有趣
山僧慣迎客煮茗新泉注岩花得春遲晚秀見紅素

蕭：野市井人物自來去溪光送孤舟古色照素樹
題名掃高壁歲月記所遇書罷迹已陳出門猶及顧

之
九月十二日入南山憇一民舍冒雨灸衣久

石稜如刀不容步上挽垂藤下無路風寒雨滑徒旅
愁捨馬杖藜泥沒履躋攀顛墜不容髮目眩心寒驚
及顧亦知垂堂有遺戒身仰微官欲誰憇：茅屋
映絕壁門外澗：清泉注解衣就火不能暖旋拾山
薪伐溪樹山翁生未食醯醢脫粟寒蔬度朝暮人間
平地固不少何用巉巘守磨兔秋聲四起山靄夕壤

屋踈籬睡無處披裘結束相勸歸過盡重雲山下去

宿州道中

眼明初見淮南樹十客相逢九吳語旅程已付夜帆
風客睡不妨舩背雨黃柑紫蟹見江海紅稻白魚飽
兒女慙慙買酒謝舩師千里勞君聊轉櫓

阻風累日泊寶積山下

繫舩淮北雨如軸繫舩淮南風斷橋客行有期日月
疾歲事欲晚霰雪驕山根浪頭作雷吼縮手敢試舟
師篙不用燃犀照幽怪要須拔劍斷長蛟

宿樊溪

黃州望樊山秀色如可攬舟扁橫江來山脚繫吾纜
大川失洶湧淺水澄可鑒北風吹踈雨夜枕舟屢撼
齊安不可望滅沒孤城暗奔流畧溪口龍蜃屢窺瞰
平生千金質戒懼敢忘暫茲游定何名耿々有餘念

道士磯

匡廬奠九江苗裔遍南服橫江蔽原野內外實一族
危磯揀江生石色擘青玉蛟龍穴亂石獠獍在喬木
我行季冬月江蹟在山腹扁舟如鏡面清淨不可觸
躋攀既不可千古長幽獨緬想邃古初巢居戒樵牧

離樊口宿巴河游馬祈寺

扁舟下樊溪江南正清瀉曉登巴河岸極目望春野
步尋修竹寺古木爭偃亞云昔孫仲謀刑牲致師禍
雄圖邈已矣英槩足悲吒石梯造雲霧丹白開廣廈
山僧安寂寞畏冷不出舍勞生遇閑境頓使我心寫
晚江平若席風勢欲相借

龜陵灣阻風三日遙禱孤山而風止

積水多疾風三日阻我舟天寒波濤惡岸窟騰龍虬
五更船蓬鳴冷氣入衾裯平明諸山雪爛熳鋪琳瑯
篙工笑相顧拍我巴船頭永愧小孤神霧鬢橫星眸
倉卒禱即應知我滯厭留稍晴景物好柳色含新柔

春風我故舊迎我入東州
自離富池凡三禱順濟龍求便風皆獲應又
風日清霽舟行安穩委如所欲感而成詩
旗尾指船頭篙工告風便張帆弛雙櫓去勢如脫箭
船傍兩高山過目若流電波平舟穩駛客寢兀未變
吾聞西江龍神力回宇縣往來萬夫禱正直乃獲願
嗟余何所恃誠確無所薦神豈哀吾窮有賜不待獻
乃知人窮我本不坐神譴人間事苦異未易以言辨
坐令千里遠近若在几研慙非謝宣城拔筆賦靜練
自黃州至巴河游靈岩寺觀孫仲謀刑馬壇

相傳權于此刑馬祀江神遂提師伐壽春云
喬木隔塵埃華堂蔽深僻人靜好鳥鳴睡餘踈雨滴
悲秋感蕭瑟吊古披荒寂尚想紫髯翁誓師沉馬壁
離泗州有作

舸舫大編來何州翩：五兩在船頭淮邊落帆汴口
宿橋下連檣南與北南來北去何時停春水春風相
送迎沙岸飛鷗舊相見短亭楊柳不無情清歌一曲
主人酒主人壽客：舉手明日酒醒船鼓鳴沙邊破
堠不知名行人十里一回首雲邊猶有塔亭：

淮陰阻雨

橋竿日：春風轉渺：孤舟教家縣朝來雨暗隔淮
村白浪卷沙吹斷岸渡頭楊柳濕青：橋下消：野
水生滿尺白魚初受釣斷行孤雁故能鳴平生行止
任遲速蓬底欠伸朝睡足從來江海有前約老去塵
埃無可欲曉天暖日生波光桃杏家：半出牆春日
春波好相待短帆輕櫓可須忙

海州道中二首

孤舟夜行秋水廣秋風滿帆不搖槳荒田寂：無人
聲水邊跳魚翻水響河邊守罾茅作屋罾頭月明人
夜宿船中客覺天未明誰家鞭牛登隴聲

秋野蒼：秋日黃：蒿滿田蒼耳長草虫吟：鳴復
咽一秋雨多水滿轍渡頭鳴春村迳斜悠：小蝶飛
豆花逃屋無人草滿家纍：秋蔓懸寒瓜

春陰泊龜山寄圓明

東風淮聲鳴萬鼓山頭孤塔藏煙霧一卷老宿何處
峯孤舟倦客沙邊雨楊柳梢頭春未多白蘋汀下正
滄波莫向春陰開病眼風煙如此奈愁何

通海夜雨寄淮上故人

黃沙渾：水滿川犇流爭岸虎眼漩南來舟子慣風
水萬斛長船如等閑濛：春雨楊柳濕漠：人家雞

犬寒道途歸人寄消息客行安穩近長安

泊州永城西寺下有感

春水沄：何處盡連檣。似當時昨日橋邊繫船。
客南來北去，知為誰他。鄉異縣各風物，游子居人長。
別離歎息，東城修竹寺，塵埃漫滅十年題。

將離柯山十月二十七日

去此定有期，逝將泛扁舟。千里須聚糧，尚復少遲留。
雖有隸囚籍，聊喜脫遐陬。問我行何之，岱宗古東州。
念我所居堂，茅蓬委荒丘。西窓兩芭蕉，誰見春萌抽。
園梅粲已發，門掩懶重游。今晨一長歎，離思浩難收。

江城

江城寒食近，風雨作輕寒。花落已可惜，春衣猶怯單。
畏人成不出，已老自無權。沽酒金明道，回頭十五年。

陽翟道中

客行趨陽翟，驅馬登高崗。羣山拱西都，回首瞰許昌。
原田秀且潤，煙水遠分行。荒塚臥石獸，古祠摧畫牆。
我行日已遠，風物非故鄉。隨俗彊飲食，所求支體彊。
兒生事弋矢，有志行四方。秣馬訪前古，吾將問興亡。

視盜之南山

窮冬策羸馬，祗役走南山。原野勢忽盡，並溪屢回澗。

列石如牛羊流泉鳴佩環西峽忽壁立仰失團圓天
淺澗凍欲絕層冰列我前躋攀越前嶺危石萬丈懸
衣薄近翠壁雲低上層巔谷深日無輝地絕風更寒
百里不逢人我徒互悲歎但見女兒峯萬尋戈劍攢
淋漓鎖冰雪冷射狐裘穿日暮投主人茅茨起孤烟
燃薪不計束未解手足拳主人前致辭問官來苦艱
我答豈得已王事不可閑饋我脫粟飯慙慙為加食
山家無酒肉粗糲味亦甘月出萬嶺光夜歸霜滿鞍
迴視所歷途猿鳥應愁顏暗想酸兩股夜眠驚夢魂
人生亦可貴何事戀微官

冬日自福昌之澠池

羣崗洛陽西勢若海浪翻連嶺起我左層阜當我前
來如獸騰突繚若蛇蜿蜒外高陟縹緲却下逼重淵
老崖忽中斷俯視毛骨寒百丈未見底立土如岩巒
登高望四垠目斷無平川崩騰萬馬羣出沒相後先
雖有貔虎軍顧步安得前我觀阨塞處塊土萬雉堅
峭澠自古險秦人有重関信哉天作固高鍵誰敢干
時平戰伐息地闢村落閑堆阜何茫々耕桑莽相連
平生喜壯觀吊古重悲歎山川只自爾興廢何多端

至日離許州

先王重至日靜息資微陽閉關絕商旅后為不省方
我獨何為者古寺嚴晨裝酌酒飲僮僕披裘冒朝霜
眷彼道路人熙然樂而康尊酒迭為壽華衣冒鮮粧
懷居固非士遠客亦可傷悠哉任行止且復傾吾觴
神運殿望香爐天池等峰晚宿官廳明日早
遠公不出山坐受龍天供地祗敢愛寶木石親輸送
岩、千年屋山立屹不動風雲宿脩梁星斗近華棟
亭、碧香爐蒼藟時自涌五雲嚴擁衛天樂下鸞鳳
神池閔寶像光怪發岩洞誰能陟其顛手攬游龍鞚

東堂黃金藏龍像儼環拱蕭條亾國輦拙樸昔誰用
掃堂為一睡清極乃無夢思歸戒晨發結束勤僕從
鴻鍾震林莽月落朝嵐重再往墮渺茫猿鶴應嘲諷

西華道中

我行陳許郊千里平若掌居民雜荆榛耕少地多曠
野兔乍跳奔驚鳶或高颺喬林多疾風寒澗有餘漲
棘籬蔽茅屋雞犬入村巷主人掃土榻秣馬具朝餉
童兒汲土井敗飯堆瓦盎勿悲為生陋自足無他望
嗟余走薄官奔走年將壯長抱羈旅愁何時稅歸鞅

舟次安州孝感縣偶感寒疾卧病舟中復大

風不可解舟晚方離

船頭風聲鳴萬鼓扁舟繫纜沙邊樹船中病客晝閉
蓬睡起空江日亭午雞犬蕭條數家縣市聲已變淮
南語長年三老喚不醒一葉波間去如舞

沈丘道中

空庭野雀噪客至休我駒盡日衝塵沙解裘振裳裾
熒々青燈光夜永寒堂虛破牕見星斗明月照廣除
篝火旋烹煎妻兒具盤盂彊飯為一飽困眠體微舒
嗟我山野姿懶拙與世疎如何彊所難妄躡仕進途
已習未易捨欲行倦馳驅悲哉不早計既晚空嗟吁

沈丘道中

霜霧沉遠星芳林語春鳥客眸帶餘睡馬力健清曉
凝煙披草際初日動林表心隨和風快興與飛雲杳
芬菲已晚悵夏陰生桑棗慷慨一據鞍此懷殊未了

宿州

野雲不作雪仲冬氣猶蒸岸雨濕枯柳北風生浪聲
昨日飲我者主人出金觥酒薄亦足醉青蛾慣逢迎
紛々舟車地主吏困怨憎樽罍備人事起論愛客誠
世途聊復尔物態惡分明十年五往返撫事感飄零
出都門泊鎖外失飲食節中夕暴下用氣術

消息之即愈

畏途戒十一飲食玩死地防患迷輕重達者笑不智
古人慎寢食愛生良有待從來天下圖不易無名指
甘飧冒物禁中夕得顛沛坐令妻孥憂憊腹委如帶
賴知仙聖術杏、存一氣船輕曉眠足扣齒無餘滯
艱難衆所虞君子謹容易永懷青精飯聊欲屏俗嗜
我別竟陵時楚稻如碧絲秋風發齊安稻穗如植旂
流年去荏苒客遠何逶迤弛檐中林下永負山中期

又

乘月入秋山月午山溪靜森森松竹林夾道散踈影
陰風留暗壑白露蒙朝嶺耿、村雞鳴坐感單衣冷

又

征人不敢安蓐食待明發潤衝石上雲冷踏松間月
艱難付一笑歲月驚屢閱偃亞道傍松茯苓應可掘

入閩過臨淮

衝寒發孤城帶雪入異縣春陰舟楫迴遠眼煙木亂
朝來雲間塔別我忽不見春流背客去應過前日岸
懷居念繾綣送別祝寢飯撫事良有懷申情能無歎

泗州阻風七日投佛經禱斗山下

山根受重淵石脚挿九地千年無支祈閉穴守禹誓
扁舟七日閑浪作老龍戲舟師慎艱險長跪請佛事
晚山水如屋曉山水如地清平一潭風浪陣卷旂旆
煌煌金仙語鬼物所尊畏無心服毒猛慧照出幽穢
人間慢聖賢諄戒遭侮易誰肯一卷書脫此千里滯
宿峻極下院
天寒蒼山高野寺在山麓長林繫我馬古屋留客宿
空岩陰風豪達旦號古木夢為神仙游境界脫塵俗
平明出戶望曉日在岩腹冰霜刮昏霾萬丈攢翠玉
山行日已久常苦未見足猶同賢者處愈久愈可欲

傳聞峻極嶺千里如在目愧尔岩上僧窮年玩幽獨

下嶠嶺

陰風吹我衣左右入石壁石色寒更青蕭蕭響枯櫪
深行方慘淡路盡兩崖闢羣山岔然來千里平若席
茲惟東周壤氣象雄萬國山河拱別都自古帝皇宅
輟轅天設險坐制萬夫力周公卜遷鼎彼肯事無益
天寒僮僕愁歲晚霜霰逼緬思垂堂戒攬轡三歎息
初離淮陰聞汲水已下呈七兄

朝離淮陰市春水滿川平依道邊人送我亦有情
千里積雪消布穀催春耕人家遠不見柳色煙中明

輕舟鳴榔子野靜遙相應連網收涖刺嘉魚飽南烹
平生晤語歡但膝聯弟兄相逢古難得白髮老易生
檣鳥飛更北汴柳綠相迎從今淮山夢却在鳳皇城

次韻七兄龜山道中

連山赴靈龜石脚疊如積巍峩黃金剝負此鼇背力
孤舟繫東風淮雨暗春色朝來一悵望別此岩下石
危檣鼓帆腹輕櫓跨浪脊林分岸忽近鳥去天末極
遠遊快新矚勝事旋陳迹悵此故里違塵駕何時息

龜山水陸院

院靜步栢影庭虛聞塔鈴連龕香慘淡古榜金青熒

山背負華殿淮身朝廣庭旛花龍護法梁棟神扶傾
練懷開山人天眼照廢興一卷檀施集百堵神鬼驚
支初萬古穴石老深潭清坐令金仙力鎮此水府靈
我來望春野高閣近青冥白髮老比丘俯俛困逢迎
豈無世外人燕坐守無名重堂百僧會合有菩薩行
平生一鉢意長歲百慮更狂逃不知迂勝地念浮生

曲河驛初見嵩少

我行日益深所過日益好森然過絕壁慘淡石色老
層峯乍崩犇峻峽忽開導清溪瀉兩間淺瀨浮水鳥
縈紆石路窄構架野橋小娟：翠篠寒時見木合抱

危亭偶平曠是日見嵩少峩々重雲外傲睨揅蒼昊
坐令羣山勢陵轍困藉蹈平生忽俗事丘壑情所好
無謀苟自給薄宦廢幽討豈無幽棲士顧我林下笑
會當採芝去富貴曷足道

平生一風駛浪湧仲達喜其快因作一篇
人生不欲甚快意遲速到家還一致向來白浪涌如
山舟中呀呷幾喪氣我師禪祖學不動頗覺蒼茫忘
定慧憑河不侮聖所非君勿為笑而為戒

青山如君子悅我非姿媚相逢一開顏便有論交意

今晨決然去慘若執我袂謂山無見留此事寧久置
道邊青髮翁下有白玉髓劇之龍蛇窟自足飽吾世
平生耽幽獨乃若安朝市一官等塵垢安得成敗計
草堂醉老子虎溪大開士寄語二主人為留三畝地

宿虹縣驛

長堤隘舟車上下無暫歇煎熬古驛門聒々爭瑣屑
東南淮浙富輪覬日填咽楚風習喧卑吳舌動嘲嘈
平生耽靜意投閑劇含噦况茲道路勤彊食慰飢渴
年來嵩洛興久與泉石結終當卜吾廬雲山對華髮

宦游

宦游吾漫尔未慕致身早秋来憶山苦遥夜夢顛倒
鳴虫待誰聽落葉煩我掃誰復省勞人吾生常草

塞獵

十月北風燕草黃燕人馬飽弓力彊虎皮裁鞞鷗羽
箭射殺陰山雙白狼青氊帳高雪不濕擊鼓傳觴打
令急戎王半醉解貂裘昭君獨抱琵琶泣

宛丘先生文集卷第九

